

欽定明史

卷三百
七十八

明史卷二百三十八

列傳第一百二十六

總裁官總理事務 經筵講官少保兼太子太保和殿大學士兼管吏部尚書事加六級張廷玉等奏
敕修

李成梁

子如松

如樟

如楨

麻貴

兄 錦等

李成梁字汝契高祖英自朝鮮內附授世鐵嶺衛指揮僉事遂家焉成梁英毅驍健有大將才家貧不能襲職年四十猶爲諸生巡按御史器之資入京乃得襲積功爲遼東險山參將隆慶元年土蠻大入永平成梁赴援有功進副總兵仍守險山尋協守遼陽三年四月張擺

失等屯塞下成梁迎擊斬之殲其卒百六十有奇餘衆遠徙遂空其地錄功進秩一等四年九月辛愛大入遼東總兵官王治道戰死擢成梁署都督僉事代之當是時俺答雖款塞而插漢部長土蠻與從父黑石炭弟委正大委正從弟煖兔拱兔子卜言台周從子黃台吉勢方強泰寧部長速把亥炒花朶顏部長董狐狸長昂佐之東則王杲王兀堂清佳砮楊吉砮之屬亦時窺塞下十年之間殷尚質楊照王治道三大將皆戰死成梁乃大修戎備甄拔將校收召四方健兒給以厚餼用爲選鋒軍聲始振明年五月敵犯盤山驛指揮蘇成勛擊走

之無何土蠻大入成梁遇於卓山麾副將趙完等夾擊斷其首尾乘勝抵巢馘部長二人斬首五百八十餘級進署都督同知世廕千戶又明年十月土蠻六百騎營舊遼陽北河去邊二百餘里俟衆集大舉成梁擊走之萬曆元年又擊走之前屯已又破走之鐵嶺鎮西諸堡增秩二等朶顏兀魯思罕以四千騎毀牆入成梁禦却之建州都指揮王杲故與撫順通馬市及是誘殺備禦裴承祖成梁謀討之明年十月杲復大舉入成梁檄副將楊騰游擊王惟屏分屯要害而令參將曹簠挑戰諸軍四面起敵大奔盡聚杲寨寨地高杲深溝堅壘以自

固成梁用火器攻之破數柵矢石雨下把總于志文秦
得倚先登諸將繼之杲走高臺射殺志文會大風起縱
火焚之先後斬馘千一百餘級毀其營壘而還進左都
督世廕都指揮同知杲大創不能軍走匿阿哈納寨曹
簠勒精騎往杲走南關都督王台執以獻斬之三年春
土蠻犯長勇堡擊敗之其冬炒花大會黑石炭黃台吉
卜言台周以兒鄧煖兔拱兔堵刺兒等二萬餘騎從平
虜堡南掠副將曹簠馳擊遂轉掠瀋陽見城外列營乃
據西北高墩成梁邀戰發火器敵大潰棄輜重走追至
河溝乘勝渡河擊斬以千計加太子太保世廕錦衣千

戶明年黑石炭大委正營大清堡邊外謀錦義成梁率
選鋒馳二百里逼其營攻破之殺部長四人獲級六十
有奇五月土蠻復入聯營河東而遣零騎西掠成梁掩
其巢得利而還明年正月速把亥糾土蠻大入營劈山
成梁馳至丁字泊敵方分騎繞牆入成梁夜出塞二百
里搗破劈山營獲級四百三十馘其長五人加太保世
廕本衛指揮使三月游擊陶承譽擊敵長定堡獻馘四
百七十有奇帝已告謝郊廟大行賞賚廕成梁世指揮
僉事有言所殺乃土蠻部曲因盜牛羊事覺懼罪來歸
承譽掩殺之給事中光懋因請治承譽殺降罪御史勘

如懋言兵部尚書方逢時督撫梁夢龍周詠先與承譽同叙功力爲解卒如御史奏盡奪諸臣恩命六月敵犯鎮靜堡復擊退之十二月速把亥炒花煖兔拱兔會土蠻黃台吉大小委正卜兒亥慌忽太等二萬餘騎壁遼河攻東昌堡深入至耀州成梁遣諸將分屯要害以遏之而親提銳卒出塞二百餘里直搗圍山斬首八百四十及其長九人獲馬千二百匹敵聞之皆倉皇走出塞論功封寧遠伯歲祿八百石是時土蠻數求貢市關吏不許大恨七年十月復以四萬騎自前屯錦川營深入成梁命諸將堅壁自督參將楊粟等遏其衝會戚繼光

亦來援敵遂退俄又與速把亥合壁紅土城聲言入海
州而分兵入錦義成梁踰塞二百餘里直抵紅土城擊
敗之獲首功四百七十有奇迤東都督王兀堂故通市
寬奠後參將徐國輔弟國臣強抑市價兀堂乃與趙鎖
羅骨數遣零騎侵邊明年三月以六百騎犯靉陽及黃
岡嶺指揮王宗義戰死復以千餘騎從永奠入成梁擊
走之追出塞二百里敵以騎卒拒而步卒登山鼓譟成
梁大敗之斬首七百五十盡毀其營壘捷聞并錄紅土
城功予成梁世襲其秋兀堂復犯寬奠副將姚大節擊
破之兀堂由是不振土蠻數侵邊不得志忿甚益徵諸

部兵分犯錦義及右屯大凌河以城堡堅不可克而成
梁及薊鎮兵亦集乃引去無何復以二萬餘騎從大鎮
堡入攻錦州參將熊朝臣固守而遣部將周之望王應
榮出戰頗有斬獲矢盡皆戰死敵乃分掠小凌河松山
杏山成梁馳援始出境九年正月土蠻復與黑石炭大
小委正卜言台周腦毛大黃台吉以兒鄧煖兔拱兔炒
戶兒聚兵塞下謀入廣寧成梁帥輕騎從大寧堡出去
塞四百餘里至襖郎兔大戰自辰迄未敵不支敗走官
軍將還敵來追成梁逆擊且戰且行先後斬首三百四
十及其長八人錄功增歲祿百石世廕一等四月黑石

炭以兒鄧小反青卜言兔入遼陽副將曹簞追至長安
堡遇伏失千總陳鵬以下三百十七人馬死者四百六
十匹遂大掠人畜而去簞等下吏成梁不問十月土蠻
復連速把亥等十餘萬騎攻圍廣寧不克轉掠團山堡
盤山驛及十三山驛攻義州成梁禦却之十年三月速
把亥率弟炒花子卜言兔入犯義州成梁禦之鎮夷堡
設伏待之速把亥入參將李平胡射中其脅墜馬蒼頭
李有名前斬之寇大奔追馘百餘級炒花等慟哭去速
把亥爲遼左患二十年至是死帝大喜詔賜甲第京師
世廕錦衣指揮使初王杲死其子阿台走依王台長子

虎兒罕以王台獻其父嘗欲報之王台死虎兒罕勢衰阿台遂附北關合攻虎兒罕又數犯孤山汎河成梁出塞遇於曹子谷斬首一千有奇獲馬五百阿台復糾阿海連兵入抵瀋陽城南渾河大掠去成梁從撫順出塞百餘里火攻古勒塞射死阿台連破阿海寨擊殺之獻馘二千三百杲部遂滅錄功增歲祿百石世廕指揮僉事北關清佳砮楊吉砮素讐南關王台沒屢侵台季子猛骨孛羅且藉土蠻煖免慌忽太兵侵邊境其年十二月巡撫李松使備禦霍九臯許之貢市清佳砮楊吉砮率二千餘騎詣鎮北關謁松九臯見其兵盛譙讓之則

以三百騎入松先伏甲於旁約二人不受撫則礮舉甲起頃之二人抵關據鞍不遜松叱之九臯麾使下其徒遽拔刀擊九臯并殺侍卒十餘人於是軍中礮鳴伏盡起擊斬二人并其從騎與清佳努子兀孫孛羅楊吉努子哈兒哈麻盡殲焉成梁聞礮急出塞擊其留騎斬首千五百有奇餘衆刑白馬攢刀誓永受約束乃旋師錄功增歲祿二百石改前廕指揮僉事爲錦衣衛指揮使方成梁之出塞也炒花等以數萬騎入蒲河及大寧堡將士防禦六日始出塞十三年二月把兔兒欲報父速把亥之怨借從父炒花姑壻花大糾西部以兒鄧等以

數萬騎入掠瀋陽既退駐牧遼河聲犯開原鐵嶺成梁與巡撫李松潛爲浮橋濟師踰塞百五十里疾掩其帳寇已先覺整衆逆戰成梁爲疊陣親督前陣擊而松以後陣繼之斬首八百有奇捷聞增歲祿百石改廕錦衣指揮使爲都指揮使其年五月敵犯瀋陽伏精騎塞下誘官軍游擊韓元功追襲之敗死閏九月諸部長復犯蒲河殺裨將數人大剽掠而西部銀燈亦窺遼瀋成梁令部將李平胡出塞三百五十里搗破銀燈營斬首一百八級諸部長聞之始引去十四年二月土蠻部長一克灰正糾把兔兒炒花花大等三萬騎約土蠻諸子共

馳遼陽挾賞成梁偵得之率副將楊燮參將李寧李興
孫守廉以輕騎出鎮邊堡晝伏夜行二百餘里至可可
母林大風雷敵不覺既至風日晴朗敵大驚發矢如雨
將士冒死陷陣獲首功九百斬其長二十四人其年十
月敵七八萬騎犯鎮夷諸堡閱五日始去十五年春東
西部連營入犯其秋八月復以七八萬騎犯鎮夷堡十
月把漢大成糾土蠻十萬騎由鎮夷大清二堡入數日
始出北關既被創後清佳砮子卜寨與楊吉砮子那林
孛羅漸強盛數與南關虎兒罕子互商構兵成梁以南
關勢弱謀討北關以輔翊之明年五月率師直搗其巢

卜寨走與那林孛羅合憑城守城四重攻之不下用巨礮擊之碎其外郭遂拔二城斬馘五百餘級卜寨等請降設誓不復叛乃班師十七年三月敵犯義州復入太平堡把總朱永壽等一軍盡沒九月腦毛大合白洪大長昂三萬騎復犯平虜堡備禦李有年把總馮文昇皆戰死成梁選鋒沒者數百人敵大掠瀋陽蒲河榆林八日始去明年二月卜言台周黃台吉大小委正結西部又漢塔塔兒五萬餘騎復深入遼瀋海蓋成梁潛遣兵出塞襲之遇伏死者千人成梁乃報首功二百八十得增祿廕土蠻族弟土墨台豬借西部青把都恰不慎及

長昂滾兔十萬騎深入海州成梁不敢擊縱掠數日而去十九年閏二月成梁乘給事侯先春閱視謀邀搗巢功使副將李寧等出鎮夷堡潛襲板升殺二百八十人師還遇敵死者數千人成梁及總督蹇達不以聞巡按御史胡克儉盡發其先後欺罔狀語多侵政府疏雖不行成梁由是不安於位及先春還朝詆尤力帝意頗動成梁再疏辭疾言者亦踵至其年十一月帝竟從御史張鶴鳴言解成梁任以寧遠伯奉朝請明年哮拜反寧夏御史梅國楨請用成梁給事中王德完持不可乃寢成梁鎮遼二十二年先後奏大捷者十帝輒祭告郊廟

受廷臣賀蟒衣金繒歲賜稠疊邊帥武功之盛二百年來未有也其始銳意封拜師出必捷威振絕域已而位望益隆子弟盡列崇階僕隸無不榮顯貴極而驕奢侈無度軍貲馬價鹽課市賞歲乾沒不貲全遼商民之利盡籠入己以是灌輸權門結納朝士中外要人無不飽其重賕爲之左右每一奏捷內自閣部外自督撫而下大者進官廕子小亦增俸賚金恩施優渥震耀當世而其戰功率在塞外易爲緣飾若敵入內地則以堅壁清野爲詞擁兵觀望甚或掩敗爲功殺良民冒級閣部共爲蒙蔽督撫監司稍忤意輒排去之不得舉其法先後

巡按陳登雲許守恩廉得其殺降冒功狀擬論奏之爲
巡撫李松顧養謙所沮止旣而物議沸騰御史朱應穀
給事中任應徵僉事李瑄交章抨擊事頗有跡卒賴奧
援反詰責言者及申時行許國王錫爵相繼謝政成梁
失內主遂以去位成梁諸戰功率藉健兒其後健兒李
平胡李寧李興秦得倚孫守廉輩皆富貴擁專城暮氣
難振又轉相掎克士馬蕭耗迨成梁去遼十年之間更
易八帥邊備益弛二十九年八月馬林獲罪大學士沈
一貫言成梁雖老尚堪將兵乃命再鎮遼東年已七十
有六矣是時土蠻長昂及把兔兒已死寇鈔漸稀而開

原廣寧之前復開馬木二市諸部耽市賞利爭就款以故成梁復鎮八年遼左少事以閱視叙勞加至太傅當萬曆初元時兵部侍郎汪道昆閱邊成梁獻議移建孤山堡於張其哈刺佃險山堡於寬佃沿江新安四堡於長佃長嶺諸處仍以孤山險山二參將戍之可拓地七八百里益收耕牧之利道昆上於朝報可自是生聚日繁至六萬四千餘戶及三十四年成梁以地孤懸難守與督撫蹇達趙楫建議棄之盡徙居民於內地居民戀家室則以大軍驅迫之死者狼籍成梁等反以招復逃人功增秩受賞兵科給事中宋一韓力言棄地非策巡

按御史熊廷弼勘奏如一韓言一韓復連章極論帝素眷成梁悉留中不下久之卒年九十弟成材參將子如松如柏如楨如樟如梅皆總兵官如梓如梧如桂如楠亦皆至參將

如松字子茂成梁長子以父廕爲都指揮同知充寧遠伯勲衛驍果敢戰少從父諳兵機再遷署都督僉事爲神機營右副將萬曆十一年出爲山西總兵官給事中黃道瞻等數言如松父子不當並居重鎮大學士申時行請保全之乃召僉書右府尋提督京城巡捕給事中邵庶嘗劾如松及其弟副總兵如柏不法且請稍抑以

全終始不納十五年復以總兵官鎮宣府巡撫許守謙
閱操如松引坐與並參政王學書却之語不相下幾攘
臂巡按御史王之棟因劾如松驕橫并詆學書帝爲兩
奪其俸已復被論給事中葉仞春請改調之乃命與山
西李迎恩更鎮其後軍政拾遺給事中閔視數遭論劾
帝終眷之不爲動召僉書中府二十年擢拜反寧夏御
史梅國楨薦如松大將才其弟如梅如樟並年少英傑
宜令討賊乃命如松爲提督陝西討逆軍務總兵官卽
以國楨監之武臣有提督自如松始也已命盡統遼東
宣府大同山西諸道援軍六月抵寧夏如松以權任旣

重不欲受總督制事輒專行兵科許弘綱等以爲非制尚書石星亦言如松敕書受督臣節度不得自專帝乃下詔申飭先是諸將董一奎麻貴等數攻城不下如松至攻益力用布囊三萬實以土踐之登爲礮石所却如樟夜攀雲梯上不克游擊龔子敬提苗兵攻南關如松乘勢將登亦不克乃決策水攻拜窘遣養子克力蓋往勾套寇如松令部將李寧追斬之已套寇以萬餘騎至張亮堡如松力戰手斬士卒畏縮者寇竟敗去水侵北關城崩如松及蕭如薰等佯擊北關誘賊而潛以銳師襲南關攀雲梯而上拜及子承恩白斬叛黨劉東暘許

朝乞貸死於是如松先登如薰及麻貴劉承嗣等繼之
盡滅拜族錄功進都督世廕錦衣指揮同知會朝鮮倭
患棘詔如松提督薊遼保定山東諸軍尅期東征弟如
柏如梅並率師援勦如松新立功氣益驕與經畧宋應
昌不相下故事大帥初見督師甲冑庭謁出易冠帶始
加禮貌如松用監司謁督撫儀素服側坐而已十二月
如松至軍沈惟敬自倭歸言倭酋行長願封請退平壤
迤西以大同江爲界如松叱惟敬儉邪欲斬之參謀李
應試曰藉惟敬給倭封而陰襲之奇計也如松以爲然
乃置惟敬於營誓師渡江二十一年正月四日師次肅

寧館行長以爲封使將至遣牙將二十人來迎如松檄游擊李寧生縛之倭猝起格鬪僅獲三人餘走還行長大駭復遣所親信小西飛來謁如松慰遣之六日次平壤行長猶以爲封使也竝風月樓以待羣倭花衣夾道迎如松分布諸軍抵平壤城諸將逡巡未入形大露倭悉登陴拒守是夜襲如柏營擊却之明旦如松下令諸軍無割首級攻圍缺東面以倭素易朝鮮軍令副將祖承訓詭爲其裝潛伏西南令游擊吳惟忠攻迤北牡丹峯而如松親提大軍直抵城下攻其東南倭礮矢如雨軍少却如松斬先退者以徇募死士援鉤梯直上倭方

輕南面朝鮮軍承訓等乃卸裝露明甲倭大驚急分兵捍拒如松已督副將楊元等軍自小西門先登如柏等亦從大西門入火器並發烟燄蔽空惟忠中礮傷胸猶奮呼督戰如松馬斃於礮易馬馳墮墜躍而上麾兵益進將士無不一當百遂克之獲首功千二百有奇倭退保風月樓夜半行長渡大同江遁還龍山寧及參將查大受率精卒三千潛伏東江間道復斬級三百六十乘勝逐北十九日如柏遂復開城所失黃海平安京畿江源四道並復酋清正據咸鏡亦遁還王京官軍旣連勝有輕敵心二十七日再進師朝鮮人以賊棄王京告如

松信之將輕騎趨碧蹄館距王京三十里猝遇倭圍數重如松督部下鏖戰一金甲倭搏如松急指揮李有聲殊死救被殺如柏寧等奮前夾擊如梅射金甲倭墮馬楊元兵亦至斫重圍入倭乃退官軍喪失甚多會天久雨騎入稻畦中不得逞倭背岳山面漢水聯營城中廣樹飛樓箭礮不絕官軍乃退駐開城二月旣望諜報倭以二十萬衆入寇如松令元軍平壤扼大同江接餉道如柏等軍寶山諸處爲聲援大受軍臨津留寧承訓軍開城而身自東西調度聞倭將平秀嘉據龍山倉積粟數十萬密令大受率死士從間焚之倭遂乏食初官軍

捷平壤鋒銳甚不復問封貢事及碧蹄敗衄如松氣大索應昌如松急欲休息而倭亦芻糧並絕且懲平壤之敗有歸志於是惟敬款議復行四月十八日倭棄王京遁如松與應昌入城遣兵渡漢江尾倭後將擊其情歸倭步步爲營分番迭休官軍不敢擊倭乃結營釜山爲久留計時兵部尚書石星力主封貢議撤兵獨留劉綎拒守如松乃以十二月班師論功加太子太保增歲祿百石言者詆其和親辱國屢攻擊之帝不問二十五年冬遼東總兵董一元罷廷推者三中旨特用如松言路復交章力爭帝置不報如松感帝知氣益奮明年四月

土蠻寇犯遼東如松率輕騎遠出搗巢中伏力戰死帝痛悼令具衣冠歸葬贈少保寧遠伯立祠謚忠烈以其弟如梅代爲總兵官授長子世忠錦衣衛指揮使掌南鎮撫司仍充寧遠伯勲衛復廕一子本衛指揮使世襲恤典優渥皆出特恩云世忠未久卒無子弟顯忠由廕歷遼東副總兵當嗣爵朝臣方惡李氏無爲言者至崇禎中如松妻武氏懇於朝章下部議竟寢後莊烈帝念成梁功顯忠子尊祖得嗣寧遠伯聞賊陷京師遇難如柏字子貞成梁第二子由父廕爲錦衣千戶嘗與客會飲礮聲徹大內下吏免官再以廕爲指揮僉事數從

父出塞有功歷密雲游擊黃花嶺參將薊鎮副總兵萬曆十六年御史任養心言李氏兵權太盛姻親廝養分操兵柄環神京數千里縱橫蟠據不可動搖如柏貪淫跋扈尤甚不早爲計恐生他變帝乃解如柏任於是成梁上書乞罷并請盡罷子弟官帝慰留不許久之起故官署宣府參將引疾歸如松之禦倭朝鮮也詔如柏署都督僉事先率師赴援旣拔平壤如柏疾趨開城攻克之斬首百六十有奇師旋進都督同知爲五軍營副將尋出爲貴州總兵官二十三年改鎮寧夏著力免犯平虜橫城如柏邀之大獲斬首二百七十有奇進右都督

再以疾歸家居二十餘年會遼東總兵官張承廕戰歿
文武大臣英國公張惟賢等合疏薦如柏詔以故官鎮
遼東蒙古炒花入犯督諸將擊却之始成梁如松爲將
厚畜健兒故所向克捷至是父兄故部曲已無復存而
如柏暨諸弟放情酒色亦無復少年英銳特以李氏世
將起自廢籍中顧如柏中情怯惟左次避敵而已我
大清師臨河如柏故引軍防懿路及楊鎬四路出師令
如柏以一軍出鴉鶻關甫抵虎欄路鎬聞杜松馬林兩
軍已覆急檄如柏還

大清哨兵二十人見之登山鳴螺作大軍追擊狀如柏

軍大驚奔走相蹴死者千餘人御史給事中交章論劾給事中李奇珍連疏爭尤力帝終念李氏詔還候勘既入都言者不已如柏懼遂自裁

如楨成梁第三子由父廕爲指揮使屢加至右都督竝在錦衣嘗掌南北鎮撫司提督西司房列環衛者四十年最後軍政拾遺部議罷職章久留不下如楨雖將家子然未歷行陣不知兵及兄如柏革任遼人謂李氏世鎮遼東邊人憚服非再用李氏不可巡撫周永春以爲言而是時如柏兄弟獨如楨在兵部尚書黃嘉善遂徇其請以如楨名上帝卽可之時萬曆四十七年四月也

如楨藉父兄勢又自以錦衣近臣不肯居人下未出關
卽遣使與總督汪可受講鈞禮朝議譁然嘉善亦特疏
言之如楨始怏怏去旣抵遼經畧楊鎬使守鐵嶺鐵嶺
故李氏宗族墳墓所在當如相還京其族黨部曲高貲
者悉隨之而西城中爲空後鎬以孤城難守令如楨還
屯瀋陽僅以參將丁碧等防守力益弱

大清兵臨城如楨擁兵不救城遂失言官交章論列經
畧熊廷弼亦論如楨十不堪乃罷任天啓初言者復力
攻下獄論死崇禎四年帝念成梁勛特免死充軍

如樟亦由父廕歷都指揮僉事從兄如松征寧夏先登

有功累進都督僉事歷廣西延綏總兵官

如梅字子清亦由父廕歷都指揮僉事從兄如松征日本却敵先登屢遷遼東副總兵二十四年炒花卜言兔將入犯如梅謀先襲之督部將方時新等出塞三百里直搗其廬帳斬首百餘級而還明年如梅與參政楊鎬謀復從鎮西堡出塞潛襲敵營失利損部將十人士卒百六十人如梅以血戰重創免罪日本封事敗其年八月進署都督僉事充禦倭副總兵赴朝鮮援剿時麻貴三路進師令如梅將左軍與右軍共攻蔚山如梅偕參將楊登山騎兵先進設伏海濱而令遊擊擺賽以輕騎

誘賊斬首四百有奇餘賊遁歸島山副將陳寅冒矢石奮呼上破柵兩重至第三柵垂拔楊鎬爲總理宿與如梅暱不欲寅功出其上遽鳴金收軍翊日如梅至攻之不能拔已而賊援至如梅軍先奔諸軍亦相繼潰贊畫主事丁應泰劾鎬并劾如梅當斬者二當罪者十帝不納旋用爲禦倭總兵官會其兄如松戰歿卽命如梅馳代之踰年坐擁兵畏敵劾罷久之起僉書左府四十年鎬巡撫遼東力薦如梅爲帥不得至以死爭給事中麻僖御史楊州鶴力持不可乃止成梁諸子如松最果敢有父風其次稱如梅然躁動非大將才獨楊鎬深信後

復倚任其兄如柏卒以致敗

麻貴大同右衛人父祿嘉靖中爲大同參將從鎮帥劉漢襲板升大獲俺答圍右衛祿與副將尚表固守乘間擊斬其部長寇乃引退辛愛犯京東祿以宣府副總兵入衛與子遊擊錦竝有却敵功貴由舍人從軍積功至都指揮僉事充宣府遊擊將軍隆慶中遷大同新平堡參將寇大入掠山陰懷仁應州將吏竝獲罪獨貴與兄副將錦拒戰有功受賞萬曆初再遷大同副總兵十年冬以都督僉事充寧夏總兵官無何徙鎮大同時諸部納款久捨力克襲封順義王奉中國益虔貴頻以安邊

勞蒙賜賚十九年爲閱視少卿曾乾亨所劾謫戍邊明年寧夏哱拜反廷議貴健將知兵且多畜家丁乃起戍中爲副將總兵討賊屢攻城不克其五月哱拜以套寇五百騎圍平虜堡貴選精卒三百間道馳却之俄以總督魏學會命撫著力免銀定宰僧於橫城啖以重利皆不應貴乃還攻城寧夏總兵董一奎攻其南固原總兵李煦攻其西故總兵劉承嗣攻其北牛秉忠攻其東貴以游兵主策應哱拜自北門出戰將往勾套部貴逐之入城別遣將馬孔英麻承詔等擊套寇援兵俘斬百二十人拜初與套部深相結諸部長稱之爲王日坐著力

免帳中主籌畫至是不敢復出俄朝命蕭如薰代董一
奎盡將諸道援兵以貴爲副而李如松軍亦至攻益急
賊奉黃金繡蟒于卜失兔等請急徇靈州先據下馬關
沮饒道卜失兔與莊禿賴果合兵犯定邊而宰僧從花
馬池西沙湃入貴迎擊挫宰僧於石溝會董一元搗土
昧巢諸部長俱解去賊復乞援於著力兔擁衆大入如
松率勁騎迎戰張亮堡自卯迄巳敵銳甚會貴及李如
樟等兵至夾擊之寇乃却逐北至賀蘭山獲首級百二
十餘持示賊賊益恟懼無何城破賊盡平貴以功增秩
予廕尋擢總兵官鎮守延綏二十二年七月卜失兔糾

諸部深入定邊營張春井貴乘虛搗其帳於套中斬首二百五十有奇還自寧塞復邀其零騎會寇留內地久轉掠至下馬關寧夏總兵蕭如薰不能禦總督葉夢熊急檄貴赴援督副將蕭如蘭等連戰驪馬臺薛家窪斬首二百三十有奇獲畜產萬五千帝爲告廟宣捷進署都督同知予世蔭明年卜失免復入寨掠八日而還順義王捨力克約之納款不從復擬大入貴勒兵萬五千人遊擊閻逢時等出紅山爲中軍參將師以律等出高家堡神木孤山爲左軍參將孫朝梁等出定邊安邊平山爲右軍而自以大軍當一面銜枚疾趨踰塞六十里

寇莫知所防大潰俘斬四百有奇獲馬駝牛羊千五百再進秩予廕尋以病歸二十五年日本封事敗起貴備倭總兵官赴朝鮮已加提督盡統南北諸軍貴馳至王京倭已入慶州據閑山島圍南原守將楊元遁全州守將陳愚衷亦遁倭乘勢逼王京貴別遣副將解生守稷山朝鮮亦令都體察使李元翼出忠清道遮賊鋒生頗有斬獲功參將彭友德亦破賊青山倭將行長退屯井邑清正還慶州經畧邢玠經理楊鎬先後至分兵三協左李如梅右李芳春解生中高策貴與鎬督左右協兵專攻清正策駐宜寧東援兩協西扼行長諸軍至慶州

倭悉退屯蔚山如梅誘敗之清正退保島山築三砦自固遊擊茅國器率死士拔其砦斬馘六百五十諸軍遂進圍其城城新築以石堅甚將士仰攻多死圍十日倭襲敗生兵明年正月二日行長來援九將兵俱潰賊張旗幟江上鎬大懼倉皇撤師以捷奏旣而敗狀聞帝罷鎬責貴以功贖與劉綎陳璘董一元分四路貴居東當清正數戰有功會平秀吉死官軍益力攻十一月清正先遁貴遂入島山西浦諸路共俘斬二千二百有奇明年三月旋師進右都督于世廕三十八年命貴鎮遼東泰寧炒花素桀驚九子各將兵他部宰賽煖兔又助之

邊將畏戰但以增歲賞爲事寇益無所忌明年臨邊要賞將士出不意擊之拔營遁徙額力素居焉其地忽天鳴地震炒花驚懼再徙渡老河去邊幾四百里其第三子色特哂之南移可可母林伺隙入犯貴伏兵敗之追北至白雲山斬馘三百四十有奇色特憤謀復讐糾宰賽以兒鄧皆不應乃東糾卜言顧伯要兒西糾哈刺漢乃蠻合犯清河皆潰以兒鄧等懼代炒花求款邊境乃寧明年插漢虎墩兔以三萬騎入掠穆家堡禦之敗去其夏貴引病乞罷詔乘傳歸貴果毅驍捷善用兵東西竝著功伐先後承特賜者七錫世廕者六及歿予祭葬

稱一時良將焉兄錦少從父行陣有戰功累官千總協守大同右衛千戶魏昂者坐罪亡入沙漠引寇至城下挾取妻子錦伏甲禽之俺答圍城數突圍城卒完尋以殺人并父奪官下吏當事以塞上方用兵而錦父子兄弟竝敢戰曲法貸之屢遷宣府遊擊將軍以勤王功進秩一等遷大同參將隆慶初進本鎮副總兵從趙尙出塞敗寇兵與弟貴竝有保境功俺答納款錦招塞外叛人歸者甚衆萬曆五年擢山西總兵官尋改鎮宣府卒錦子承勛遼東副總兵都督僉事南京後府僉書從子承恩都督同知宣府延綏大同總兵官更歷諸鎮以勇

力聞後起援遼東屢退避下獄當死詔內馬八百匹免
罪其家遂破承詔寧夏參將從平倭拜有功後爲蒼頭
所弑承訓薊鎮副總兵承宣洮岷副總兵承宗遼東副
總兵天啓初戰死沙嶺麻氏多將才人以方鐵嶺李氏
曰東李西麻

贊曰自俺答款宣大薊門設守固而遼獨被兵成梁遂
擅戰功至剖符受封震耀一時倘亦有天幸歟麻貴宣
力東西勲閥可稱兩家子弟多歷要鎮是以時論以李
麻竝列然列戟擁麾世傳將種而恆怯退避隳其家聲
語曰將門有將諸人得無愧乎

明史卷二百二十八終

明史卷二百三十九

列傳第一百二十七

總裁官總理事務 經筵講官 保兼李太保 保和殿大學士 兼管吏部 鄧尚書 加六級 張廷玉等奉

敕修

張臣

子承慶 全昌

孫應昌 德昌

董一元

王保

杜桐

弟松 孫弘域

子文煥

蕭如薰

達雲

尤繼先

官秉忠

柴國柱

李懷信

張臣榆林衛人起行伍爲隊長驕捷精悍搏戰好陷堅從千總劉朋守黃甫川朋遇寇喪馬被圍臣單騎馳救射中其魁奪馬載朋歸由此知名旋代朋職屢戰跨馬

梁李家溝高家堡田家梁西紅山並有功遷宣府膳房
堡守備寇嘗大入環攻堡欲生得臣臣召麾下酌水爲
酒歡呼歌飲寇莫測所爲不敢登臣夜決圍出取他道
以歸上官壯之擢延綏入衛遊擊將軍隆慶元年九月
土蠻大入昌黎撫寧樂亭盧龍遊騎至灤河諸將莫敢
戰臣獨勒兵赴之遼帥王治道曰敵衆我寡往必無利
臣不顧率所部千人擐甲直馳呼聲震山谷寇以數騎
嘗奮前斬之追至棒槌崖斬首百十餘級墜崖死傷者
無算事寧薊鎮諸將悉獲罪臣以功增秩二級無何寇
潛入場子嶺參將吳昂被殺命臣代之尋進副總兵領

總督標下事改守薊鎮西協萬曆初錄秋防功進署都督僉事炒蠻潛入古北口參將苑宗儒追至十八盤山戰歿餘衆被圍臣急偕遊擊高廷禮等馳救寇始去坐鐫一秩五年春以總兵官鎮守寧夏順義王俺答報怨瓦剌欲取道賀蘭臣不可俺答恚語不遜臣夜決漢唐二渠水道不通復陳兵赤水口俺答乃從山後去三歲互市毋敢譁者閱邊給事中以苛禮責望劾罷之十一年小阿卜戶犯黑峪關守將陳文治以下俱逮繫詔起臣副總兵駐守馬蘭峪會朶顏長昂屢擾邊薊鎮總兵官楊四畏不能禦乃調四畏保定而徙臣代之長昂雅

憚臣使其從母土阿妻東桂款關乞降乃撫賞如初猛可眞者俺答弟老把都棄妾也坐與小阿卜戶犯黑峪關罷歲賞旣納款復猖獗以謾詞報邊臣而令大嬖只代爲謝罪大嬖只者順義王乞慶哈棄妾也臣等測其詐令將士出塞捕二十三人繫之獄令還我被掠人猛可眞以所愛者五人在俘中許獻還所掠親叩關索故賞臣等并召大嬖只入演武場譙責甚厲兩婦叩頭請死乃貸之先後獻還八十餘人中有被拘數十年者臣以功紀錄優敘尋進署都督同知召僉書左府事出爲陝西總兵官鎮守固原十八年春移鎮甘肅火落赤犯

洮河卜失兔將往助之其母泣沮不從遂攜妻女行由
永昌宋家莊穴牆入臣逆戰水泉三道溝手格殺數人
奪其坐纛卜失兔及其黨炒胡兒竝中流矢走臣亦被
創將士斬級以百數生獲其愛女及牛馬羊萬八百有
奇卜失兔仰天大慟曰傷哉我女悔不用母言以至此
也自是不敢歸巢與宰僧匿西海已屬宰僧謝罪其母
及順義王亦代爲言乃還其女而使歸套臣以功進秩
爲真時諸部長桀驚甚經畧鄭洛專主款臣以爲不足
恃上書陳八難五要大畧云邊薄兵寡餉絀寇驕諸部
順逆難明宜復額兵嚴勾卒足糧餉分敵勢明賞罰且

以創重乞歸帝不許後二年謝病去臣更歷四鎮名著塞垣爲一時良將子承廕由父廕積功至延綏副總兵勇而有謀尤精騎射數鏖戰未嘗挫衄萬曆三十七年代王威爲延綏總兵官沙計及猛克什力數犯邊是年冬復犯波羅神木承廕邀卻之追斬八十餘人沙計欲修貢守臣惡其反覆拒之益徙近邊以數千騎犯雙山堡承廕擊走之俘斬百二十有奇四十年沙計復入塞承廕遮擊之嚮水斬首百七十餘級積前功進署都督同知世廕本衛副千戶是歲遼東總兵官麻貴罷敕承廕馳代之蟒金諸部近寧前守將祖天壽間出獵被圍

曹莊將士死者二百三十人被掠者六百餘人天壽以數騎免事聞論死承廕初抵任獲免敖克等犯中後所拒斬其二長餘走出塞時虎墩兔炒花煖兔宰賽逼處遼境無歲不犯邊承廕未至時虎墩兔以三萬騎犯穆家堡參將郎名忠等遏斬其四十餘騎及再舉守將梁汝貴襲破其營已而乃蠻諸部連犯中後所連山驛副總兵李繼功等力戰殪其魁徐引去自是虎墩兔所屬貴英哈等三十餘部悉奉約束遼西得少安承廕旋以病去甫歲餘起守薊鎮未至復改鎮遼東四十六年四月我

太祖高皇帝起兵拔撫順巡撫李維翰趣承廕赴援承廕急率副將頗廷相參將蒲世芳遊擊梁汝貴等諸營竝發次撫順承廕據山險分軍三立營浚濠布列火器甫交鋒

大清兵蹶之大潰承廕世芳皆戰死廷相汝貴已潰圍出見失主將亦陷陣死將士死者萬人生還者十無一二舉朝震駭既而撫安三岔兒白家衝三堡連失詔逮維翰贈承廕少保左都督立祠曰精忠世廕指揮僉事廷相以下贈廕有差承廕子應昌全昌德昌應昌嗣祖臣職當爲指揮僉事以父陣亡增三秩爲都司僉書經

畧楊鎬用爲左翼遊擊四路出師使從李如柏天啟元年遷大同井坪參將調延綏二年秋河套入犯不能禦免歸督師孫承宗召置麾下命駐錦州承宗去高第盡撤松錦守具應昌亦歸崇禎二年總督楊鶴檄應昌署定邊鎮將事河套入寇擊斬百二十餘級擢昌平副總兵鶴遂薦應昌以副將鎮定邊四年春神一元陷保安應昌偕左光先破斬一元其弟一魁代領其衆圍慶陽應昌及杜文煥趨戰圍始解不沾泥圍米脂應昌偕王承恩擊走之楊鶴撫一魁處之寧塞而殺其黨茹成名賊黨張孟金黃友才懼挾一魁以叛延綏巡撫張福臻

令應昌及馬科擊之斬首千七百餘級友才走一魁守
不下其冬洪承疇代鶴命參政戴君恩總兵曹文詔同
應昌討之數敗賊賊棄城走文詔偕應昌擊敗之駙馬
溝明年春應昌禽友才混天猴陷宜君鄜州龔靖邊應
昌追敗之射傷賊將白廣恩八月山西總兵官馬上麟
病免擢應昌都督僉事代之言者謂寧武卒善逃宜令
應昌率所部三千人以從報可王之臣陷臨縣其地倚
黃雲山榆林河水出焉入於黃河城三面峭壁西阻水
巡撫許鼎臣總督張宗衡督兵攻賊與土寇田福田科
等相倚久不拔會王自用陷遼州逼會城鼎臣還專以

恢復責應昌六年春賊約福劫官軍撫標中軍陳國威因僞稱之臣往逆斬福頭懸城下急擊賊始降應昌在關中威名甚著及是選愼逗撓務與賊相避總督宗衡五檄之不赴奏諸朝限應昌與文詔三月平賊應昌避賊不擊殺良民冒功爲巡按御史李嵩兵科祝世美所劾帝乃遣近侍爲應昌內中軍七月部卒潰鳴謙驛監視中官劉允中劾其避賊帝猶貸之令會勦畿南賊久之擊賊平山僞報首功連爲允中及巡按御史馮明玠真定巡撫周堪賡所劾帝令圖功自贖七年春追賊靈寶稍有功已擊賊均州五嶺山敗績身中一矢退還河

南其弟全昌爲宣府總兵官宣府有警令應昌援又無功命解職候勘八年洪承疇出師河南令率私家士馬以從三月抵信陽會賊大入秦承疇命應昌及鄧玘尤翟文防漢江南北玘死承疇以賊必由鳳縣棧道直入畧陽改命應昌翟文自鄖陽轉赴與安漢中以會左光先趙光遠諸軍至六月艾萬年曹文詔相繼戰歿賊盡趨西安承疇急檄應昌及光先還救八月李自成陷咸陽越二日應昌先兵至擊斬四百四十餘級獲軍師一人及全昌兵敗陷賊其潰卒歸關中掠沿河州縣山西巡撫吳甡請令應昌收置麾下應昌已得疾不能軍

無何卒全昌由廕敘歷官靈州參將崇禎四年與同官
趙大允擊點燈子於中部已連戰邵陽韓城首功多巡
撫練國事請加二將副將銜大允駐耀州富平間扼賊
西路全昌駐韓城邵陽間扼賊東路五年七月代應昌
爲定邊副總兵曹文詔追賊隴州平鳳界全昌及馬科
率千人應之殄滅殆盡明年五月擢署都督僉事充總
兵官鎮守宣府應昌方鎮山西兄弟接壤爲大帥明年
七月

大清兵西征插漢旋師入其境攻圍龍門新城赤城克
保安州薄鎮城全昌嬰城固守已而

大清兵西行全昌進兵應州帝以其孤軍敕吳襄尤世威赴援不應全昌至渾源以捷聞還軍葛峪羊房口襄等復不援八月

大清兵再入其境閏八月四日克萬全右衛他城堡多失守既解嚴兄應昌以罪解職命全昌并將其軍兵科常自裕言文臣張宗衡等重論而武臣輕貸非法於是全昌與文詔竝戍邊用山西巡撫吳姓請命全昌文詔爲援勦總兵官與猛如虎等大破高加計八年春會洪承疇於汝寧擊敗汝州賊俄西入關與祖大弼敗賊涇陽未幾敗賊醴泉五月與賀人龍敗老回回於秦王嶺

尋解鳳翔圍走賊秦州敗之張家川已而都司田應龍
張應龍戰死艾萬年曹文詔相繼歿官軍益衰賊盡趨
西安承疇急檄全昌及曹變蛟先赴渭華格其前親督
軍尾其後却賊紅鄉溝賊乃南入商維承疇又命全昌
及趙光遠提兵三千截潼關大峪口部卒大譁闌入榮
澤劫庫殺人河南巡撫元默請急援盧氏不聽光遠擅
歸關中全昌迤邐至潁州九月中追蝎子塊於沈邱瓦
店戰敗被執賊挾之攻蘄黃全昌因代賊求撫總理盧
象昇不許責全昌喪師辱國曰賊果欲降可滅其黨示
信賊不聽命久之全昌脫歸謁象昇陽和象昇令募兵

山陝尋薦之朝令赴軍前立功帝不許十年四月以楊嗣昌言逮付法司謫戍邊衛德昌崇禎初爲清水營守備三年夏勦王嘉胤被傷坐奪官久之起歷保定參將連破土寇仁義王十四年春總督楊文岳命從虎大威以五千人援開封不敢進其冬擢保定副總兵仍從文岳數有功十六年卒贈特進榮祿大夫左都督

董一元宣府前衛人父暘嘉靖中爲宣府遊擊將軍俺答犯滴水崖力戰死贈官錫廕春秋世祀兄一奎都督僉事歷鎮山西延綏寧夏三邊以勇敢著一元勇如兄而智畧過之嘉靖時歷薊鎮遊擊將軍土蠻黑石炭等

以萬餘騎犯一片石總兵官胡鎮禦之一元功最超俸
三級遷石門寨參將隆慶初破敵棒槌崖功復最再進
二級遷副總兵駐防古北口移守宣府萬曆十一年以
都督僉事爲昌平總兵官尋徙宣府十五年徙薊州久
之劾罷鄭洛經畧洮河命一元練兵西寧火落赤入犯
一元擊之西川多所斬獲尋以副總兵協守寧夏擢延
綏總兵官哮拜之亂套中諸部長悉助之一元乘其西
掠輕騎搗土昧巢獲首功百三十驅其畜產而還寇內
顧引去進署都督同知入爲中府僉事遼東自李成梁
後代以楊紹勳一歲三失事尤繼先繼之半歲病去廷

議擇帥乃以命一元泰寧速把亥爲官軍所殺其次子把兔兒常欲復讐從父炒花及姑壻花大助之勢益強西部卜言台周故插漢土蠻子也部衆十餘萬與把兔兒東西相倚數侵邊至是卜言合一克灰正腦毛大諸部聲犯廣寧而把兔兒以炒花花大煖兔伯言兒之衆營舊遼陽將入掠鎮武錦義一元與巡撫李化龍策曰卜言雖衆然去邊遠我特患把兔兒及炒花耳今其衆不過萬騎破之則西部將不戰走乃遣副將孫守廉馳右屯禦西部而親將大軍匿鎮武外爲空營待之寇騎馳入營大笑以爲怯乃深入官軍忽從中起奮呼陷陣

自午至酉寇大奔逐北七十餘里至白沙塢俘斬五百四十有奇獲馬駝二千計伯言兒中矢死把兔兒亦傷餘衆終夜馳天明駐馬環哭其明日卜言台周入右屯攻五日夜守廉等固守乃引去時二十二年十月也捷聞帝大喜祭告郊廟宣捷行賞進一元左都督加太子太保廕本衛世指揮使兵部尚書石星以下亦進秩有差伯言兒最慄悍諸部倚以爲強嘗誘殺慶雲守備王鳳翔坐革歲賞至是被殲諸部爲奪氣其部下遂納款把兔兒炒花及卜言台周爪兔兒反青復臨邊駐牧期以明年正月畧遼瀋東西一元慮歲晏不備爲寇所乘

乃先西巡以遏其鋒化龍亦留弱卒廣寧數西發以疑寇一元提健卒踏水渡河監軍楊鎬與之俱度墨山天大雪將士氣益奮行四百里三日夜乃抵其巢斬首百二十級獲牛馬甲仗無算全師而還把免兒以鎮武創重歎曰我竟不獲報父讐乎未幾死其衆散亂諸部悉遠遁一元以功進世廕二秩久之以病歸命王保代朝鮮再用師詔一元隸總督邢玠麾下參贊軍事尋代李如梅爲禦倭總兵官時兵分四路一元由中路禦石曼子於泗州先拔晉州下望晉乘勝濟江連毀永春昆陽二寨賊退保泗州老營攻下之遊擊盧得功陣歿前逼

新寨寨三面臨江一面通陸引海爲濠海艘泊寨下千計築金海固城爲左右翼一元分馬步夾攻步兵遊擊彭信古用大槓擊寨碎其數處衆軍進逼賊濠毀其柵忽營中礮裂煙焰漲天賊乘勢衝擊固城援賊亦至騎兵諸將先奔一元亦還晉州事聞詔斬遊擊馬呈文郝三聘落信古等職充爲事官一元亦奪宮保貶秩二等會關白死倭遁走石曼子爲陳璘所殲一元得還故秩資銀幣久之卒一元歷鎮衝邊竝著勞績與麻貴張臣杜桐達雲爲邊將選云王保榆林衛人驍勇絕倫起行伍積功爲延綏參將萬曆十六年遷延綏定邊副總兵

十九年冬擢署都督僉事充昌平總兵官尋改山西薊鎮總兵官張邦奇被劾命保與易任自嘉靖庚戌後薊鎮重於他鎮穆宗有詔獲大小部長者破格酬他鎮不得比迨俺答款塞宣大山西三鎮烽煙寂然陝西四鎮以火落赤敗盟始復用兵然寇弱易禦獨秦寧插漢諸部時時犯遼東而薊門密邇王畿與遼帥俱慎選以保有威望用之朶顏長昂當張臣鎮薊時納款居五六年復連寇石門路木馬峪花場谷遂罷其市賞後偕銀燈寇山海關已又馳喜峰口要賞邦奇佯許增市誘殺其通事二十五人長昂益怒犯大青山頃之遣其黨小郎

兒等潛伏喜峰口射殺偵卒會保已至遂禽之長昂每
賚小郎兒籌策懼而謝罪獻還被掠人畜保乃釋還小
郎兒長昂補五貢邊吏始補二賞互市如初御史陳遇
文援穆宗詔以請進保署都督同知副將張守愚以下
皆進秩薊三協南營兵戚繼光所募也調攻朝鮮撤還
道石門鼓譟挾增月餉保誘令赴演武場擊之殺數百
人以反聞給事中戴士衡御史汪以時言南兵未嘗反
保縱意擊殺請遣官按問巡關御史馬文卿庇保言南
兵大逆有十尚書石星附會之遂以定變功進保秩爲
真廕子督撫孫鑛李頤等亦進官受賜時論尤之二十

三年冬順義王捨力克弟趕兔率三軍犯白馬關及東西臺爲守備徐光啓副將李芳春戴延春所却明年秋復偕部長倒布犯黑谷頂敗而去保度其再至分營開連口及橫河兒寇果馳橫河官軍夜半疾抵石塘嶺襲其營寇大驚潰乘勢追出塞其冬復犯羅文峪敗去詔代一元鎮遼東朝鮮再用師敕保防海卒於海州贈左都督子學書宣府總兵官學詩學禮並副總兵學書旣里居守榆林城拒李自成不屈死

杜桐字來儀崑山人徙延安衛萬曆初由世廕累官清水營守備以謀勇著遷延綏入衛遊擊將軍改古北口

參將用總督梁夢龍薦擢延綏副總兵十四年就拜署
都督僉事充總兵官時卜失兔以都督同知爲套中主
威令不行其下各雄長志常叵朔漠素無痘症自嘉
靖庚戌深入石州染此症犯者輒死打兒漢者卜失兔
祖吉能部落也數將命奉貢累官指揮同知一日互市
還與其儕禿退台吉等俱染痘死禿退子阿計疑邊吏
酖其父思亂及卜失兔西助火落赤共擾河西諸部遂
蠢動十九年冬打兒漢子土昧與他部明安互市訖復
臨邊要賞聲犯內地桐與巡撫賈仁元計先出兵襲之
乃令參將張剛自神木遊擊李紹祖自孤山桐率輕騎

自榆林三道竝出遇寇力戰大破之斬首四百七十餘級馘明安而還延綬自吉能納款塞上息肩二十年自此兵端復開明安子擺言太日思報復寇鈔無已時矣桐先被劾罷以是役功超授右都督僉書後府二十一年以總兵官鎮保定二十四年徙延綬明年再徙鎮寧夏著力免宰僧入犯逆戰水塘溝俘斬百二十寇益糾諸部連犯平虜興武桐督諸將馬孔英鄧鳳蕭如蕙等連破之斬首二百餘級而延綬將士亦數搗巢諸部長懼乞款詞甚哀三十年二鎮撫臣孫維城黃嘉善協謀撫之乃復貢市論功文臣自內閣以下悉進官桐以先

去職但資銀幣許復用而已久之卒於家桐自偏裨至大帥積首功一千八百時服其勇弟松字來清有膽智勇健絕倫由舍人從軍累功爲寧夏守備萬曆二十二年卜失免掠張春井大入下馬關松偕遊擊史見李經以二千餘騎邀擊馬蓮井小勝誤入伏中見戰死松經皆重傷士卒死過半麻貴援軍至松復裹創力戰寇始敗走時松已進遊擊將軍論功遷延綏參將貴大舉搗巢松以右軍出清平塞多所斬獲進副總兵尋以本官改寧夏東路松爲將廉尚氣不能容物常因小忿薙髮爲僧部議聽其歸尋起孤山副總兵三十三年擢署都

督僉事代李如樟鎮延綏明年套寇犯安邊懷遠松大破之改鎮薊州三十六年夏代李成梁鎮遼東十二月敗敵連山驛賴暈歹者朶顏長昂子也狡黠爲邊患與從父蟒金潛入薊鎮河流口大掠去復結黃台吉謀犯喜峰口松受總督王象乾指潛搗黃台吉帳以牽薊寇乃從寧遠中左所夜馳至哈流兔掩殺拱兔部落百四十餘級以大捷聞邀重賞副使馬拯謂拱兔內屬不當勦彼且復讐與松相訐松忿邀賞愈急詔予之拱兔果以無罪見勦怒小歹青又數激之乃以五千騎攻陷大勝堡執守將耿尚仁支解之深入小凌河肆焚掠遊擊

于守志遇於山口大敗死千餘人守志亦重創松駐大凌河不敢救遼人多咎松朝議謂松前僅抵錦州邊十里未嘗出塞所殺乃保塞部落悉縛殺之非陣斬松愈忿言無按諸臣附會馬拯害其奇功自提兵出塞將搗巢以雪前恥而所得止五級士馬多陷大凌河松益慙憤數欲自經盡焚其鎧胃器仗置一切疆事弗問兵部以聞乃勒松歸里而以王威代之松既廢時多惜其勇然惡其僨事無推轂之者至四十三年河套寇大入令松以輕騎搗火落赤營獲首功二百有奇復敘用逾二年薊遼多事特設總兵官鎮山海關以松任之四十六

年張承廕戰歿詔松馳援遼陽明年二月楊鎬議四路
出師以撫順最衝令松以六萬兵當之故總兵趙夢麟
保定總兵王宣爲佐期三月二日抵二道關會李如柏
等竝進松勇而無謀剛愎使氣二十九日夜出撫順關
日馳百餘里抵渾河半渡河流急不能盡渡松醉趣之
將士多溺河中松遂以前鋒進連克二小砦松喜三月
朔乘勢趨撒爾湖谷口時

大清方築城界凡山上役夫萬五千以精騎四百護之
聞松軍至精騎則盡伏谷口以待松軍過將半伏兵尾
擊之追至界凡渡口與築城夫合據山旁吉林崖明日

松引大軍圍崖別遣將營撒爾湖山上松軍攻崖方戰
大清益千人助之已又續遣二旗兵趨界凡以爲援而
遣六旗兵攻松別將於撒爾湖山明日六旗兵大戰破
撒爾湖山軍死者相枕藉所遣助吉林崖者自山馳下
擊松軍二旗兵亦直前夾擊松兵大敗松與夢麟宣皆
歿於陣橫屍亘山野流血成渠

大清兵逐北二十里至勺琴山而還時車營五百尚阻
渾河而松已敗頃之馬林劉綎兩軍亦敗獨李如柏一
軍遁還事聞朝議多咎松輕進天啓初贈少保左都督
世廕千戶立祠賜祭宣亦贈官立祠世廕指揮僉事宣

榆林人夢麟見父尙傳桐子文煥字敬武由廕敘歷延綏遊擊將軍累進參將副總兵四十三年擢署都督僉事寧夏總兵官延綏被寇文煥赴救大破之明年遂代官秉忠鎮延綏屢敗寇安邊保寧長樂斬首三百有奇西路火落赤卜言太懼相率降沙計數盜邊爲文煥所敗遂納款旣而復與吉能明愛合駐高家柏林邊要封王補賞十事文煥襲其營斬首百五十火落赤諸部落攢刀立誓獻罰九九九九者部落中罰駝馬牛羊數也巳沙計又伏兵沙溝誘殺都指揮王國安糾猛克什力犯雙山堡復犯波羅文煥擊破之追奔二十餘里當是

時套寇號十萬然其衆分四十二枝多者二三千少不及千騎屢不得志沙計乃與吉能明愛猛克什力相繼納款延綏遂少事文煥尋以疾歸天啓元年再鎮延綏詔文煥援遼文煥乃遣兵出河套搗巢以致寇諸部大恨深入固原慶陽圍延安揚言必縛文煥掠十餘日始去命解職候勘奢崇明圍成都總督張我續請令文煥赴救至則圍已解借諸軍復重慶崇明遁永寧文煥頓不進尋擢總理盡統川貴湖廣軍度不能制賊謝病去坐延綏失事罪戍邊七年起鎮寧夏寧錦告警詔文煥馳援俄令分鎮寧遠進右都督調守關門尋引疾去崇

禎元年錄重慶功廕指揮僉事三年陝西羣盜起五鎮總兵竝以勤王行總督楊鶴請令文煥署延鎮事兼督固原軍數敗賊賊亦日益多會山西總兵王國樑擊王嘉允於河曲大敗賊入據其城部議設一大將兼統山陝軍協討乃令文煥爲提督偕曹文詔馳至河曲絕饑道以困之神一元陷寧塞文煥家破遂留文詔令文煥西還四年御史吳牲劾其殺延川難民冒功給事中張承詔復劾之下獄褫職十五年用總督楊文岳薦以故官討賊無功復謝病歸子弘域天啓初歷延綏副總兵七年夏文煥援遼卽擢總兵官代鎮寧夏積資至右都

督崇禎中提督池河浦口二營練兵遏賊南渡頗有功
十三年移鎮浙江尋謝病去國變後文煥父子歸原籍
崑山卒

蕭如薰字季馨延安衛人萬曆中由世廕百戶歷官寧
夏參將守平虜城二十年春哮拜劉東暘據寧夏鎮城
反遣其黨四出畧地拜子承恩徇玉泉營遊擊傅桓拒
守爲其下所執賊已徇中衛及廣武參將熊國臣等棄
城奔列城皆風靡賊黨土文秀徇平虜獨如薰堅守不
下如薰妻楊氏故尚書兆女也賢而有智贊夫死守日
具牛酒犒士拜養子雲最驍勇引河套著力免急攻如

薰伏兵南關佯敗誘賊入射雲死餘衆敗去又襲著力兔營獲人畜甚多著力兔憤復來攻爲麻貴所却城獲全初帝聞如薰孤城抗賊大喜厚賚銀幣擢官副總兵六月遂以都督僉事爲寧夏總兵官盡統延綏甘肅固原諸援軍其秋竟與李如松等共平賊再進署都督同知蔭錦衣世指揮僉事妻楊氏亦被旌二十二年八月卜失兔西犯定邊關入固原塞副將姜直不能禦遂由沙梁墮牆入直抵下馬關縱橫內地幾一月如薰免官直下吏尋復以總兵官鎮守固原套寇入犯擊却之青海寇糾番族犯洮岷如薰及臨洮總兵孫仁禦之禽斬

三百四十有奇撫叛番五千人獲駝馬甲仗無算再鎮
寧夏銀定反成數入犯輒挫衄去徙鎮薊州久之罷歸
再起故官鎮延綏天啓初廷議京軍不足用召邊將分
營訓練如薰典神機營陛見帝賜食加獎勞焉明年出
鎮徐州俄召還京復以總兵官鎮守保定五年夏魏忠
賢黨劾其與李三才聯姻遂奪職崇禎初卒賜恤如制
如薰爲將持重更歷七鎮所在見稱自隆慶後款市旣
成烽燧少警輦下視鎮帥爲外府山人雜流乞朝士尺
牘往者無不饜所欲薊鎮戚繼光有能詩名尤好延文
士傾貲結納取足軍府如薰亦能詩士趨之若鶩賓座

常滿妻楊氏繼妻南氏皆貴家女至脫簪珥供客猶不給軍中患苦之如薰莫能却也一時風會所尚諸邊物力爲耗識者歎焉如薰祖漢涼州副總兵都督僉事父文奎京營副將都督同知兄如蘭陝西副總兵都督僉事事前府僉書如蕙寧夏總兵官都督同知如芷提督南京教場都督僉事

達雲涼州衛人勇悍饒智畧萬曆中嗣世職指揮僉事擢守備進肅州遊擊將軍炒胡兒入犯偕參將楊濬擊敗之遷西寧參將永邵卜者順義王俺荅從子也部衆強盛先嘗授都督同知再進龍虎將軍自以貢市在宣

府守臣遇已厚不可逞乃隨俺答西迎活佛留據青海
與瓦刺他卜囊歲爲西寧患嘗誘殺副將李魁邊臣不
能報益有輕中國心二十三年九月九日度將士必燕
飲擁勁騎直入南川屬番偵告雲設兵要害令番人繞
出朶爾硤口外潛扼其背而已提精卒二千與戰方合
伏忽起寇首尾不相顧番人夾擊大敗之雲手馘其帥
一人斬首六百八十餘級其走峽外者又爲番人所殲
獲駝馬戎器無算爲西陲戰功第一所馘把都爾哈卽
前殺李魁者其他卽魁陣亡處時又皆九月也先是副
將李聯芳爲寇所殺總兵尤繼先生獲其雙言邊人以此

二事爲快雲旣勝度寇必復至厚集以待踰月寇果連
真相火落赤諸部先圍番刺卜爾寨以誘官軍番不能
支合於寇寇遂逼西川雲督諸軍營康纏溝寇悉衆圍
之矢石如雨雲左右衝擊自辰至申戰數十合寇死傷
無算乃以長鎗鈎杆專犯西寧軍西寧軍堅不可破寇
始遁追奔數十里而還捷聞帝大喜遣官告郊廟宣捷
大學士趙志臯以下悉進官雲擢都督同知蔭本衛世
指揮使寇歲掠諸番番不敵則折而入寇及寇敗遠徙
雲急招番復業有七千餘戶永邵卜連犯明沙上谷雲
竝擊走之初南川奏捷雲已進副總兵至是命以總兵

官鎮守延綏未幾鎮甘肅二十六年永邵卜復犯西寧
參將趙希雲等陣歿雲坐停俸甘寧間有松山賓兔阿
赤兔宰僧著力兔等居之屢爲兩鎮患巡撫田樂決策
恢復雲偕副將甘州馬應龍涼州姜河永昌王鐵塊等
分道襲之寇遠竄盡拔其巢攘地五百里雲以功進右
都督廕世指揮僉事無何青海寇糾衆分犯河西五道
俱有備獻首功百七十有奇松山旣復爲築邊垣分屯
置戍錄功進左都督寇戀其故巢乘官軍撤防時潛兵
入犯雲據險邀擊之寇大敗斬首百六十加雲太子少
保寇益糾其黨犯鎮番雲及諸將葛賴等大破之斬首

三百七十餘級帝爲告廟行賞進雲世廕二秩寇復入犯雲破走之是時寇失松山走據賀蘭山後連青海諸部寇鈔不已銀定反成尤桀驁三十三年連營犯鎮番雲遣副將柴國柱擊之寇大敗去未幾青海寇復大入將士分道遮擊生禽其長沙賴餘敗奔三十五年敘功雲增勲廕是年松山青海二寇復連兵犯涼州雲逆戰紅崖大獲斬首百三十有奇雲爲將先登陷陣所至未嘗挫衄名震西陲爲一時邊將之冠以秋防卒於軍贈太子太保子奇助萬曆末爲昌平總兵官尤繼先榆林衛人萬曆中積功爲大同副總兵十八年火落赤真相

犯洮河副總兵李聯芳等戰死詔進署都督僉事充總兵官代劉承嗣鎮守固原寇據莽刺捏工二川日蠶食番族且擾西寧聞官軍大集卜失兔又敗於水泉乃乘冰堅渡黃河北走留其黨可卜列宗塔兒等五百餘人牧莽刺川南山南山卽石門大山口走烏思藏門戶也屬番來告繼先乃令番以八百人前導與故總兵承嗣遊擊原進學吳顯等疾馳七百里直抵南山奮擊大破之斬首百五十有奇生獲十二人而拜巴爾的者可卜列從子前殺聯芳至是被禽師旋寇尾至撒川見有備乃夜走他寇犯鎮羌西寧石羊亦俱敗火落赤遂徙帳

西海錄功進秩爲真增世廕一秩尋以病歸起僉中軍府事二十一年冬爲遼東總兵官炒花二千騎入韓家路繼先督諸軍奮擊寇乃去再引疾歸二十四年起鎮薊州自戚繼光鎮守十年諸部雖叛服不常然邊警頗稀寇嘗一入青山口輒敗去最後長昂導班白二部長入犯道石門關山海關京東民盡逃入通州繼先出關寇已縱掠寧前去總督蹇達怒繼先不追擊而繼先方收召降丁八百人欲倚爲用達乃疏言番情難馭恐遺後憂請調繼先別鎮俾降丁隨往部議以延綏杜松與易任巡撫劉四科爭之達復疏言守邊在自強繼先獨

言惟藉降丁去歲出關何竟不得降丁力羽書狎至邊
隘虛實久爲所窺呼吸變生安所措手兵科宋一韓等
力主達議且劾繼先他事繼先遂罷卒於家繼先眇一
目習兵攻戰時稱獨目將軍

官秉忠榆林衛人萬曆中起世廕歷官固原參將擢寧
夏甘肅副總兵嘗與主將達雲大破寇於紅崖銀定反
成屢被挫去移守薊鎮東協積功加署都督同知四十
年五月擢總兵官代張承廕鎮延綏套寇犯保寧秉忠
督參將杜文煥等敗之白土澗一日再捷俘斬二百五
十馘其長十二人無何旗牌撒勒犯長樂秉忠將輕騎

追襲之大獲猛克什力犯保寧秉忠又破之已而猛克
挾賞不獲再寇保寧及懷遠秉忠隨所向以勁騎遮擊
先後斬首二百二十有奇猛克及旗牌復以千餘騎犯
波羅遙見保寧軍遂遁出塞吉能者卜失兔子爲套中
之主士馬雄諸部見卜失兔襲順義王補其五年市賞
遂挾求封王且還八年市賞邊臣不許則大怨會他部
鐵雷以痘瘡死妄言邊吏毒殺之而沙計盜邊又被劔
去吉能遂合套中諸部大舉入寇東道高家大柏油神
木柏林中道波羅西道磚井寧塞諸城堡盡被蹂躪副
將孫洪謨禦之大柏油中伏被圍遊擊萬化孚等不救

士卒死傷過半洪謨遂降秉忠聞寇入急遣遊擊張榜潛劫其營又敗死四百餘人會故帥杜松寧夏帥杜文煥援軍至並破敵而秉忠所部亦有斬獲寇始退然猶駐塞下時鈔掠秉忠亦屢出襲擊多獲首功竟以前負被劾去官方候代沙計謀從雙山建安入犯秉忠設伏待之遂大敗去斬其首二百有奇四十六年與劉綎柴國柱等同被召令僉書前府尋赴援遼東楊鎬之四路出師也令秉忠防守鎮城無何辭疾歸久之卒子撫民亦爲寧夏總兵官

柴國柱西寧衛人萬曆中由世廕歷西寧守備驍猛善

射從參將達雲擊寇南川勇冠軍錄功進都指揮僉事
寇盜邊輒爲國柱所挫屢進涼州副總兵松山旣復方
建堡置候寇數來擾國柱頻擊却之銀定反成連兵寇
鎮番國柱馳救斬首二百有奇獲馬駝甲仗無算青海
寇大掠鎮羌黑古城諸堡守備楊國珍不能禦國柱急
率遊擊王允中等擊走之銀定反成復犯河西國柱邀
擊獲首功百二十擢署都督僉事陝西總兵官三十六
年春改鎮甘肅銀定反成屢不得志益寇鈔永昌國柱
馳與大戰敗之追至麻山湖斬首百六十有奇其部落
復入寇守備鄭崇雅等戰歿國柱坐奪俸一年河套松

山諸部長合兵入寇國柱檄諸將分道擊復斬首百六十屢加右都督世廕指揮僉事久之罷官四十六年夏召僉書都督府事無何代杜松鎮山海關松敗歿虎墩兔乘機犯邊國柱等力遏之尋移鎮瀋陽謝病歸天啓初追錄邊功加左都督卒賜恤如制

李懷信大同人由世廕歷都指揮僉事掌山西都司廉勤數被推薦萬曆中遷延綏中路參將進定邊副總兵卜失兔火落赤鐵雷擺言太等歲擾邊定邊居延綏西被患尤棘懷信勇敢有謀寇入輒敗其先後鎮帥杜松王威張承蔭官秉忠又皆一時選故邊患雖劇而士氣

不衰四十三年擢甘肅總兵官延人爲立生祠松山寇入掠蘆溝墩諸處懷信邀擊大敗之斬首三百有奇獲駝馬甲仗無算已復分三道犯鎮番諸堡懷信亦分遏之寇引還將士尾其後獲首功百九十有奇自後寇入多失利去威名著河西先是陝西止設四鎮自西寧多警增設臨洮總兵官遂爲五鎮然惟甘延最當敵衝故擇帥常慎而甘肅北有松山南臨青海諸部落環居其外尤難禦懷信在鎮邊人恃以無恐四十七年遼東急詔充援勦總兵官馳赴遼東時熊廷弼爲經畧令懷信偕柴國柱賀世賢以四萬人守瀋陽煖兔炒花謀入犯

廷弼急移懷信戍首山寇不敢入俄泛懿有警檄懷信禦却之遼事益急諸老將多引避廷弼復負氣凌諸將懷信不能堪亦堅臥引疾去天啓二年起鎮大同明年罷已追錄邊功進左都督久之卒於家

贊曰張臣諸人勇畧自奮著效邊陲均一時良將選也董一元白沙竭墨山之捷奇偉不下王越至承廕與松以將門子捐軀報國視世所稱東李西麻者相去何等也

明史卷二百三十九終

明史卷二百四十

列傳第一百二十八

總管總理事務 經筵講官 保兼太子太保保和殿大學士 兼管吏部尚書事 加六級 遷廷玉筆

敕修

葉向高

劉一燝

兄一煜

一煜

韓爌

朱國祚

朱國禎

何宗彥

孫如游

孫嘉績

葉向高字進卿福清人父朝榮養利知州向高甫妊母避倭難生道旁敗厠中數瀕死輒有神相之舉萬曆十一年進士授庶吉士進編修遷南京國子司業改左中允仍視司業事二十六年召爲左庶子充皇長子侍班

官礦稅橫行向高上疏引東漢西邸聚錢事爲鑑不報尋擢南京禮部右侍郎久之改吏部再陳礦稅之害又請罷遼東稅監高淮語皆切至妖書獄與移書沈一貫力諫一貫不悅以故滯南京九年後一貫罷沈鯉亦去朱賡獨當國帝命增閣臣三十五年五月擢向高禮部尚書兼東閣大學士與王錫爵于慎行李廷機並命十一月向高入朝慎行已先卒錫爵堅辭不出明年首輔賡亦卒次輔廷機以人言久杜門向高遂獨相當是時帝在位日久倦勤朝事多廢弛大寮或空署士大夫推擇遷轉之命往往不下上下乖隔甚廷臣部黨勢漸成

而中官榷稅開礦大爲民害帝又寵鄭貴妃福王不肖之國向高用宿望居相位憂國奉公每事執爭效忠蓋帝心重向高體貌優厚然其言大抵格不用所救正十二三而已東宮輟講者五年廷臣屢請不得命三十七年二月向高擇吉以請亦不報自是歲春秋必懇請帝皆不納貴妃王氏太子生母也薨四日不發喪向高以爲言乃發喪而禮官上其儀注稽五日不行向高復爭之疏乃下福王府第成工部以之國請向高擬旨上帝不發改明春及期迫向高請先飭儀衛舟車帝不納四十一年春廷臣交章請復論改明春已忽傳旨莊田非

四萬頃不行廷臣大駭向高因進曰田四萬頃必不能足之國且無日明旨又不信於天下矣且王疏引祖制而祖制無有是事曩惟世宗時景王有之景王久不之國皇考在裕邸危疑不安此何可效也帝報曰莊田自有成例且今大分已定何猜向高因疏謝言皇考時名位雖未正然講讀不輟情意通今東宮輟講八年且不奉天顏久而福王一日兩見以故不能無疑惟堅守明春期而無以莊田藉口天下疑自釋帝報福王無一日兩見事向高有裁斷善處大事錦衣百戶王曰乾者京師奸人也與孔學趙宗舜趙聖等相訐告刑官讞未竟

曰乾乃入皇城放礮上疏刑官大驚將擬曰乾死罪曰
乾遂訐奏鄭妃內侍姜巖山與學等及妖人王三詔用
厭勝術詛咒皇太后皇太子死擁立福王帝震怒遶殿
行半日曰此大變事宰相何無言內侍即跪上向高奏
奏言此事大類往年妖書然妖書匿名難詰今兩造具
在一訊即情得陛下當靜處之稍張皇則中外大擾至
其詞牽引貴妃福王尤可痛恨臣與九卿所見皆同敢
以聞帝讀竟太息曰吾父子兄弟全矣明日向高又言
曰乾疏不宜發發則上驚聖母下驚東宮貴妃福王皆
不安宜留中而別諭法司治諸奸人罪且速定明春之

國期以息羣喙則天下帖然無事帝盡用其言太子福王得相安貴妃終不欲福王之國言明年冬太后七十壽王宜留慶賀帝令內閣宣諭向高留上諭弗宣請今冬預行慶壽禮如期之國帝遣中使至向高私邸必欲下前諭向高言外廷喧傳陛下欲假賀壽名留福王約千人伏闕請今果有此諭人情益疑賊將信王曰乾妖言朝端必不靜聖母聞之亦必不樂且潞王聖母愛子亦居外藩何惓惓福王爲因封還手諭帝不得已從之福王乃之國向高嘗上疏言今天下必亂必危之道蓋有數端而災傷寇盜物怪人妖不與焉廊廟空虛一也

上下否隔二也士大夫好勝喜爭三也多藏厚積必有
悖出之釁四也風聲氣習日趨日下莫可挽回五也非
陛下奮然振作簡任老成布列朝署取積年廢弛政事
一舉新之恐宗社之憂不在敵國外患而卽在廟堂之
上也其言絕痛切帝知其忠愛不能行初向高入閣未
幾陳用人理財策力請補缺官罷礦稅見帝不能從乃
陳上下乖離之病兩疏乞罷帝不允向高自獨相卽請
增閣臣帝不聽及吏部尚書孫丕揚以薦賢不用求去
向高特疏請留亦不報遂引疾屢諭乃出視事已又言
臣屢求去輒蒙恩諭留顧臣不在一身去留而在國家

治亂今天下所在災傷死亡畿輔中州齊魯流移載道加中外空虛人才俱盡罪不在他人臣何可不去且陛下用臣則當行其言今章奏不發大僚不補起廢不行臣微誠不能上達留何益誠用臣言不徒糜臣身臣溘先朝露有餘幸矣帝不省京師大水四方多奏水旱向高又言自閣臣至九卿臺省曹署皆空南都九卿亦止存其二天下方面大吏去秋至今未嘗用一人陛下萬事不理以爲天下長如此臣恐禍端一發不可收也帝亦不省四十年春向高以歷代帝王享國四十年以上者自三代迄今止十君勸帝力行新政因復以用人行

政請亦不報向高志不行無月不求去帝輒優旨勉留
向高復言臣進退可置不問而百寮必不可盡空臺諫
必不可盡廢諸方巡按必不可不代中外離心輦轂肘
腋間怨聲憤盈禍機不測而陛下務與臣下隔絕帷幄
不得關其忠六曹不得舉其職舉天下無一可信之人
而自以爲神明之妙用臣恐自古聖帝明王無此法也
先是向高疾閣中無人章奏就其家擬旨者一月及是
向高堅臥益久卽家擬旨如前論者以爲非體向高亦
自言其非堅乞去帝卒不命他相遣鴻臚官慰留至帝
萬壽節始起視事其後向高主癸丑會試章奏皆送闈

中尤異事云帝考選科道七十餘人命久不下向高懇請數十疏越二年乃下言官既多攻擊紛起帝心厭之章悉留中向高請盡付所司定其去留因言大臣者小臣之綱今六卿止趙煥一人而都御史十年不補彈壓無人人心何由戢帝但責言官妄言而大僚迄不補向高請增置閣臣章至百餘上帝始用方從哲吳道南向高疏謝因引退優詔不允四十二年二月皇太后崩三月福王之國向高乞歸益數章十餘上至八月允其去向高以三載考績進太子太保文淵閣大學士敘延綏戰功加少保兼太子太保改戶部尚書武英殿一品三

載滿加少傅兼太子太傅改吏部尚書建極殿至是命
加少師兼太子太師賜白金百彩幣四表裏大紅坐蟒
一襲遣行人護歸向高在相位務調劑羣情輯和異同
然其時黨論已大起御史鄭繼芳力攻給事中王元翰
左右兩人者相角向高請盡下諸疏敕部院評曲直罪
其論議顛倒者一二人以警其餘帝不報諸臣既無所
見得失益樹黨相攻未幾又爭李三才之事黨勢乃成
無錫顧憲成家居講學東林書院朝士爭慕與游三才
被攻憲成貽書向高暨尚書孫丕揚訟其賢會辛亥京
察攻三才者劉國縉以他過掛察典喬應甲亦用年例

出外其黨大譁向高以大體持之察典得無撓而兩黨之爭遂不可解及後齊楚浙黨人攻東林殆盡浸尋至天啟時王紹徽等撰所爲東林點將錄令魏忠賢按氏名逐朝士以向高嘗右東林指目爲黨魁云向高歸六年光宗立特詔召還未幾熹宗立復賜救趣之屢辭不得命天啟元年十月還朝復爲首輔言臣事皇祖八年章奏必發臣擬卽上意所欲行亦遣中使傳諭事有不_可臣力爭皇祖多曲聽不欲中出一旨陛下虛懷恭已信任輔臣然間有宣傳滋疑議宜慎重綸音凡事令臣等擬上帝復旨報聞旋納向高請發帑金二百萬爲東

西用兵之需熹宗初政羣賢滿朝天下欣欣望治然帝本冲年不能辨忠佞魏忠賢客氏漸竊威福搆殺太監王安以次逐吏部尚書周嘉謨及言官倪思輝等大學士劉一燝亦力求去向高言客氏出復入而一燝顧命大臣不得比保姆致使人揣摩於奧突不可知之地其漸當防忠賢見向高疏刺已恨甚旣而刑部尚書王紀削籍禮部尚書孫慎行都御史鄒元標先後被攻致仕去向高爭不得因請與元標同罷帝不聽而忠賢益恨向高向高爲人光明忠厚有德量好扶植善類再入相事冲主不能審直如神宗時然猶數有匡救給事中章

允儒請減上供袍服奄人激帝怒命廷杖向高論救者再乃奪俸一年御史帥衆指斥宮禁奄人請帝出之外以向高救免給事中傅樾救王紀將貶謫亦以向高言僅奪俸紀既罷去御史吳姓王祚昌薦之部議以故官召忠賢怒將重譴文選郎向高亦救免給事中陳良訓疏譏權奄忠賢摘其疏中國運將終語命下詔獄窮治主使向高以去就爭乃奪俸而止熊廷弼王化貞論死言官勸帝速決向高請俟法司覆奏帝從之有請括天下布政司府州縣庫藏盡輸京師者向高言郡邑藏已竭藩庫稍餘倘盡括之猝有如山東白蓮教之亂何以

應之帝皆不納忠賢既默恨向高而其時朝士與忠賢
抗者卒倚向高忠賢乃時毛舉細故責向高以困之向
高數求去四年四月給事中傅繼勅左光斗魏大中交
通汪文言招權納賄命下文言詔獄向高言文內閣
辦事實臣具題光斗等交文言事曖昧臣用文言顯然
乞陛下止罪臣而稍寬其他以消縉紳之禍因力求速
罷當是時忠賢欲大逞憚衆正盈朝伺隙動得繼疏喜
甚欲藉是羅織東林終憚向高舊臣并光斗等不罪止
罪文言然東林禍自此起至六月楊漣上疏劾忠賢一
十四大罪向高謂事且決裂深以爲非廷臣相繼抗章

至數十上或勸向高下其事可決勝也向高念忠賢未
易除閣臣從中挽回猶冀無大禍乃具奏稱忠賢勤勞
朝廷寵待厚盛滿難居宜解事權聽歸私第保全終始
忠賢不悅矯帝旨敘已功勤累百餘言向高駭曰此非
奄人所能必有代爲草者探之則徐大化也忠賢雖憤
猶以外廷勢盛未敢加害其黨有導以興大獄者忠賢
意遂決於是工部郎中萬燦以劾忠賢廷杖向高力救
不從死杖下無何御史林汝翥亦以忤奄命廷杖汝翥
懼投遵化巡撫所或言汝翥向高甥也羣奄圍其邸大
譟向高以時事不可爲乞歸已二十餘疏至是請益力

乃命加太傅遣行人護歸所給賜視彝典有加尋聽辭
太傅有司月給米五石輿夫八向高旣罷去韓爌朱國
禎相繼爲首輔未久皆罷居政府者皆小人清流無所
依倚忠賢首誣殺漣光斗等次第戮辱貶削朝士之異
己者善類爲一空云熹宗崩向高亦以是月卒年六十
有九崇禎初贈太師諡文忠

劉一燝字季晦南昌人父曰材嘉靖中進士陝西左布
政使萬曆十六年一燝與兄一焜一煜並舉於鄉越七
年又與一煜並舉進士改庶吉士授檢討一焜爲考功
郎掌京察大學士沈一貫欲庇其私人錢夢臯鍾兆斗

等屬一燦爲請一燦謝不可夢臯等竟以中旨留由是忤一貫意尋歷祭酒詹事掌翰林院事四十五年春京察黨人用事謀逐孫承宗繆昌期等一燦力保持得免故事掌院無滿歲不遷者一燦居四年始遷禮部右侍郎教習庶吉士光宗卽位擢禮部尚書兼東閣大學士參預機務偕何宗彥韓爌並命時內閣止方從哲一人萬曆末年神宗欲用史繼偕沈灌兩人方在籍帝命召之未及至帝復命宗彥一燦爌明日復命朱國祚及舊輔葉向高而宗彥國祚向高亦皆在籍惟一燦爌入直甫拜命帝已得疾一燦偕諸臣召見乾清宮明年九月

朔帝崩諸臣入臨畢一燎詰羣奄皇長子當樞前卽位
今不在何也羣奄東西走不對東宮伴讀王安前曰爲
李選侍所匿耳一燎大聲言誰敢匿新天子者安曰徐
之公等慎勿退遂趨入白選侍選侍頷之復中悔挽皇
長子裾安直前擁抱疾趨出一燎見之急趨前呼萬歲
捧皇長子左手英國公張惟賢捧右手掖升輦及門宮
中厲聲呼哥兒却還使使追躡者三輩一燎傍輦疾行
翼升文華殿先卽東宮位羣臣叩頭呼萬歲事稍定選
侍猶趨還乾清時選侍居乾清一燎曰乾清不可居殿
下宜暫居慈慶皇長子心憚選侍然之一燎語安曰主

上冲年無母后外庭有事吾受過宮中起居公等不得
辭責明日嘉謨及左光斗疏請移宮時首輔從哲徘徊
其間已又欲緩移宮一燝曰本朝故事仁聖嫡母也移
慈慶慈聖生母也移慈寧今何日可姑緩耶初五日借
同官請即日降旨竚立宮門以俟選侍不得已移噦鸞
宮天子復還乾清事始大定帝旣踐阼從哲被劾在告
一燝遂當國與燝相得甚歡念內廷惟王安力衛新天
子乃引與共事安亦傾心嚮之所奏請無不從發內帑
抑近倖搜遺逸舊德宿齒布滿九列中外欣欣望治焉
明年天啟改元瀋陽失廷臣多請復用熊廷弼一燝亦

言廷弼守遼一載殘疆宴然不知何故翦除及下廷議
又皆畏懼不敢異同嗣後軍國大事陛下當毅然主持
敕諸臣洗心滌慮悉破雷同附和共憂國奉公帝優旨
褒答尋有詔盡謫前排廷弼者姚宗文等官言路多怨
一燬一燬嘗言任天下事者惟六官言路張則六官無
實政善治天下者俾六官任事言路得繩其愆言官陳
事政府得裁其是則天下治於是一切條奏悉下部議
有不經者詔格之初選侍將移宮其內豎李進忠劉朝
田詔等盜內府祕藏過乾清門仆金寶墮地帝怒悉下
法司案治甚急羣奄懼構蜚語言帝薄先朝妃嬪致選

侍移宮日跌足投井以搖惑外廷御史賈繼春遂上安
選侍書刑部尚書黃克纘給事中李春騰御史王業浩
輩張大其辭欲脫盜奄罪帝惡繼春妄言且疑其有黨
將嚴譴之一燝謂天子新卽位輒疑臣下朋黨異時奸
人乘間士大夫必受其禍乃具疏開帝意爲繼春解而
反覆言朋黨無實繼春得削籍去御史張慎言高弘圖
疏救繼春帝欲并罪亦以一燝言而止帝憾選侍甚必
欲誅盜奄王安爲司禮亦惡之諸奄百方救卒不得久
而帝漸忘前事安亦爲魏忠賢排死諸奄乃厚賄忠賢
爲地而上疏辨寃帝果免朝詔死下其疏法司一燝執

奏詔等議誅久無可雪疏直下部前無此制帝不得已
下其疏於閣一燬復言此疏外不由通政司內不由會
極門例不當擬旨謹封還原疏由是忠賢輩大恨朝等
亦竟免死益任用定陵工成忠賢欲以爲功一燬援故
事內臣非司禮掌印及提督陵工不得濫廕止擬加恩
三等諸言官論客氏被謫者一燬皆疏救又請出客氏
於外及言官交章論沈淮淮疑一燬主之與忠賢客氏
等比而齟一燬一燬持大體不徇言路意言路頗怨又
密窺魏客等漸用事一燬勢孤是年四月候補御史劉
重慶遂力詆一燬不可用帝怒謫重慶一燬再論救不

聽而職方郎中余大成御史安伸給事中韋蕃霍維華
交章劾一燬帝不問旣而維華外轉其同官孫杰疑一
燬屬嘉謨爲之上疏力攻一燬一燬疏辨求罷帝已慰
留給事中侯震暘御史陳九疇復劾之并刺其結納王
安於是一燬四疏乞歸忠賢從中主之傳旨允其去先
是從哲數稱一燬爲首輔一燬不敢當虛位俟葉向高
及向高至入讒言謂一燬尼已至是知其無他力稱一
燬有翼衛功不可去帝復慰留一燬堅臥不起二年正
月疏十二上乃令乘傳歸旣歸兵部尚書張鶴鳴與奸
細杜茂劉一燬獄欲指一燬爲一燬族株連之刑部尚

書王紀不可遂被斥去而一燦得白鶴鳴一燦向所推轂者也己而忠賢大熾矯旨責一燦誤用廷弼削官追奪諾命勒令養馬崇禎改元詔復官遣官存問一燦在位累加少傅太子太傅吏部尚書中極殿大學士八年卒贈少師福王時追謚文端一焜字元丙萬曆二十年進士授行人歷考功郎中佐侍郎楊時喬典京察盡斥執政私人己改文選遷太常少卿以憂去久之由故官擢右僉都御史巡撫浙江帝遣中官曹奉建鎮海寺於普陀山一焜偕巡按李邦華爭不可不聽織造中官劉成卒一焜屢疏請勿遣代己得請會命中官呂貴護成

遺裝奸人遂請留貴督織造疏直達禁中一焜與邦華極論其罪帝卒命貴代之一焜復疏爭不報貴既任條行十事多侵擾一焜疏駁且禁治其爪牙貴爲斂威一焜以暇築龕山海塘千二百丈濬復餘杭南湖民賴其利御史沈珣誣訐其贓私一焜自引去卒贈工部右侍郎一焜兵部郎中

韓爌字象雲蒲州人萬曆二十年進士選庶吉士進編修歷少詹事充東宮講官四十五年擢禮部右侍郎協理詹事府久之命教習庶吉士泰昌元年八月光宗嗣位拜禮部尚書兼東閣大學士入叅機務未幾光宗疾

大漸與方從哲劉一燝同受顧命時官府危疑燝竭誠翼衛中外倚以爲重大帥李如柏如楨兄弟有罪當逮治中旨寬之燝與一燝執奏逮如律以登極恩加太子太保戶部尚書文淵閣大學士從哲去一燝當國燝協心佐理天啟元年正月兩人以帝爲皇孫時未嘗出閣讀書請於十二日卽開經筵自後日講不輟從之遼陽失都城震驚燝一燝以人情偷玩擬御札戒勵百官共圖實效帝納之廷臣以兵餉大絀合詞請發帑燝一燝亦以爲言詔發百萬兩大婚禮成加少保吏部尚書武英殿大學士廕一子尚寶司丞未幾以貴州平苗功加

少傅太子太傅建極殿大學士帝封乳母客氏爲奉聖夫人大婚成當出外仍留之宮中御史畢佐周切諫六科十三道復連署爭皆不納爍一爍引祖制爲言乃命俟梓宮發引擇日出宮二年四月禮部尚書孫慎行劾方從哲用李可灼紅丸藥罪同弑逆廷議紛然一爍已去位爍特疏白其事曰先帝以去年八月朔踐阼臣及一爍以二十四日入閣適鴻臚寺官李可灼云有仙丹欲進從哲愕然出所具問安揭有進藥十分宜慎語臣等深以爲然卽諭之去二十七日召見羣臣先帝自言不用藥已二十餘日至二十九日遇兩內臣言帝疾已

大漸有鴻臚寺官李可灼來思善門進藥從哲及臣等皆言彼稱仙丹便不敢信是日仍召見諸臣問安畢先帝卽顧皇上命臣等輔佐爲堯舜又語及壽宮臣等以先帝山陵對則云是朕壽宮因問有鴻臚官進藥從哲奏云李可灼自謂仙丹臣等未敢信先帝卽命傳宣臣等出移時可灼至同入診視言病源及治法甚合先帝喜命速進臣等復出令與諸醫商確一燂語臣其鄉兩人用此損益參半諸臣相視實未敢明言宜否須臾先帝趣和藥臣等復同入可灼調以進先帝喜曰忠臣忠臣臣等出少頃中使傳聖體服藥後暖潤舒暢思進飲

膳諸臣歡躍而退比申末可灼出云聖上恐藥力不繼欲再進一丸諸醫言不宜驟乃傳趣益急因再進訖臣等問再服復何狀答言平善如初此本日情事也次日臣等趨朝而先帝已於卯刻上賓矣痛哉方先帝召見羣臣時被袞憑几儼然顧命皇上焦顏侍側臣等環跪傍徨操藥而前顙天以禱臣子際此憾不身代凡今所謂宜慎宜止者豈不慮於心實未出於口抑且不以萌諸心念先帝臨御雖止旬月恩膏實被九垓爲臣子者宜何如頌揚何如紀述乃禮臣忠憤之激談與遠邇驚疑之紛議不知謂當時若何情景而進藥始末實止如

此若不據實詳剖直舉非命之凶稱加諸考終之令主恐先帝在天之靈不無恫怨皇上終天之念何以爲懷乞渙發綸音布告中外俾議法者勿以小疑成大疑編篡者勿以信史爲謗史文震孟建言護譴論救甚力三年以山東平妖賊功加少師太子太師時葉向高當國曠次之及楊漣劾魏忠賢二十四大罪忠賢頗懼求援於曠曠不應忠賢深銜之旣向高罷曠爲首輔每事持正爲善類所倚然向高有智術籠絡羣奄曠惟廉直自持勢不能敵而同官魏廣微又深結忠賢遍引邪黨其冬忠賢假會推事逐趙南星高攀龍曠急率朱國禎等

上言陛下一日去兩大臣臣民失望且中旨徑宣不復到閣而攀龍一疏經臣等擬上者又復更易大駭聽聞有傷國體忠賢益不悅傳旨切責未幾又逐楊漣左光斗陳于廷朝政大變忠賢勢益張故事閣中秉筆止首輔一人廣微欲分其柄囑忠賢傳旨諭熿同寅協恭而責次輔毋伴食熿惶懼卽抗疏乞休畧言臣備位綸扉咎愆日積如詰戎宜先營衛而觀兵禁掖無能紓宵旰憂忠直尚稽召還而撈掠朝堂無能回震霆怒後先諸臣之罷斥諭旨中出之紛更不能先時深念有調劑之方又不能臨事執持爲封還之戇皆臣罪之大者皇上

釋此不問責臣以協恭責同官以協贊同官奉詔以從事臣欲補過無由矣乞亟褫臣官爲佐理溺職之戒得旨卿親承顧命當竭忠盡職乃歸非於上退有後言今復悻悻求去可馳驛還籍諸輔臣請如故事加以體貌不報曠疏謝有左右前後務近端良重綸綍以重仕途肅紀綱以肅朝宁語忠賢及其黨益恨曠去朱國禎爲首輔李蕃攻去之顧秉謙代其位公卿庶僚皆忠賢私人矣五年七月逆黨李魯生劾曠削籍除名又假他事坐贓二千斃其家人於獄曠鬻田宅貸親故以償乃棲止先墓上莊烈帝登極復故官崇禎元年言者爭請召

用爲逆黨楊維垣等所扼但賜敕存問官其一子至五月始遣行人召之十二月還朝復爲首輔帝御文華後殿閱章奏召熿等諭以擬旨務消異同開誠和衷期於至當熿等頓首謝退言上所諭甚善而密勿政機諸臣參互擬議不必顯言分合至臣等晨夕入直勢不能報謝賓客商政事者宜相見於朝房而一切禁私邸交際帝卽諭百寮遵行二年正月大學士劉鴻訓以張慶臻敕書事被重譴熿疏救不聽溫體仁許錢謙益御史任贊化亦疏許體仁帝召見廷臣體仁力詆贊化及御史毛羽健爲謙益死黨帝怒切責贊化熿請寬贊化以安

體仁帝因謂進言者不憂國而植黨自名東林於朝事何補爨退具揭言人臣不可以黨事君人君亦不可以黨疑臣但當論其才品臧否職業修廢而黜陟之若戈矛妄起於朝堂畛域橫分於宮府非國之福也又率同官力救贊化不納皇長子生請盡蠲天下積逋報可時大治忠賢黨爨與李標錢龍錫主之列上二百六十二人罪分六等名曰欽定逆案頒行天下言者爭擊吏部尚書王永光南京禮部主事王永吉言之尤力帝怒將罪之爨等言永吉不宥永光必不安乃止奪俸一年工部尚書張鳳翔奏厰庫積弊帝怒召對廷臣詰責巡視

科道王都高賚明二人力辨帝命錦衣官執之爇標龍錫並救解而是日永光以羽健疏劾請帝究主使者爇退申救都等因言永光不宜請究言官帝不納然羽健卒獲免初熊廷弼旣死傳首九邊屍不得歸葬至是其子詣闕疏請爇等因言廷弼之死由逆奄欲殺楊漣魏大中誣以行賄因盡殺漣等復懸坐廷弼贓銀十七萬刑及妻孥寃之甚者帝乃許收葬時遼事急朝議汰各鎮兵又以兵科給事中劉懋疏議裁驛卒帝以問爇爇言汰兵止當清占冒及增設冗兵爾衝地額兵不可汰也驛傳疲累當責按臣核減以甦民困其所節省仍還

之民帝然之御史高捷史堇以罪免永光力引之都御史曹于汴持不可永光再疏爭爇言故事當聽都察院咨用帝方眷永光不從九月以將行慶典請停秋決亦不從時逆案雖定永光及袁弘勛捷堇輩日爲翻案計至十月

大清兵入畿甸都城戒嚴初袁崇煥入朝嘗與錢龍錫語邊事龍錫東林黨魁也永光等謀因崇煥興大獄可盡傾東林倡言

大清兵之入由崇煥殺毛文龍所致捷遂首攻龍錫逐之明年正月中書舍人加尚寶卿原抱奇故由輸貲進

亦劾爌主款誤國招寇欺君郡邑殘破宗社阽危不能設一策拔一人坐視成敗以人國僥倖宜與龍錫並斥其言主款者以爌崇煥座主也帝重去爌貶抱奇秩無何左庶子丁進以遷擢愆期怨爌亦劾之而工部主事李逢申劾疏繼上爌卽三疏引疾詔賜白金彩幣馳驛遣行人護歸悉如彝典進逢申並爌會試所舉士也爌先後作相老成慎重引正人抑邪黨天下稱其賢獨嘗庇王永光云十七年春李自成陷蒲州迫爌出見不從賊執其孫以脅爌止一孫乃出見賊釋其孫爌歸憤鬱而卒年八十矣

朱國祚字兆隆秀水人萬曆十一年進士第一授修撰進洗馬爲皇長子侍班官尋進諭德日本陷朝鮮石星惑沈惟敬言力主封貢國祚面詰星此我鄉曲無賴因緣爲奸利耳公獨不計辱國乎星不能用二十六年超擢禮部右侍郎湖廣稅監陳奉橫甚國祚貽書巡按御史曹楷令發其狀帝怒幾逮楷奉亦因此撤去尚書余繼登卒國祚攝部事時皇長子儲位未定冠婚踰期國祚屢疏諫戚臣鄭國泰請先冠婚後冊立國祚抗疏言本朝外戚不得與政事冊立大典非國泰所宜言况先冊立後冠婚其儀仗冠服之制祝醮敕戒之辭陞降坐

立之位朝賀拜舞之節因名制分因分制禮甚嚴且辨一失其序名分大乖違累朝祖制背皇上明綸犯天下清議皆此言也又言冊立之事理不可緩初謂小臣激聒故遲之後羣臣勿言則曰待嫡及中宮久無所出則曰皇長子體弱須其強今又待兩宮落成矣自三殿災朝廷大政令率御文華殿三禮之行在殿不在宮頃歲趣辦珠寶戶部所進視陛下大婚數倍之遠近疑陛下借珠寶之未備以遲典禮且詔旨採辦珠寶額二千四百萬而天下賦稅之額乃止四百萬卽不充國用不給邊需猶當六年乃足必待取盈而後舉大禮幾無時矣

已又言太祖成祖仁宗卽位初卽建儲貳宣宗英宗冊爲皇太子時止二歲憲宗孝宗止六歲陛下亦以六歲未聞年十九而不冊立者國祚攝尚書近二年爭國本至數十疏儲位卒定陝西狄道山崩其南湧小山五國祚請修省社稷壇枯樹生烟復陳安人心收人望通下情清濫獄四事雲南巡撫陳用賓進土物國祚劾之尋轉左侍郎改吏部御史湯兆京劾其縱酒踰檢帝不問國祚遂引疾歸光宗卽位以國祚嘗侍潛邸特旨拜禮部尚書兼東閣大學士入閣參機務天啓元年六月還朝尋加太子太保進文淵閣國祚素行清慎事持大體

稱長者明年會試故事總裁止用內閣一人是科用何宗彥及國祚有譏其中旨特用者國祚旣竣事卽求罷優詔不允都御史鄒元標侍經筵而躡帝遣中使問狀國祚進曰元標在先朝直言受杖故步履猶艱帝爲之改容刑部尚書王紀爲魏忠賢所逐國祚合疏救復具私揭爭之紀爲禮部侍郎時嘗以事忤國祚者也三年進少保太子太保戶部尚書改武英殿十三疏乞休詔加少傅兼太子太傅乘傳歸明年卒贈太傅諡文恪從子大啓文選郎中終刑部左侍郎同時朱國禎字文寧烏程人萬曆十七年進士累官祭酒謝病歸久不出天

啓元年擢禮部右侍郎未上三年正月拜禮部尚書兼東閣大學士與顧秉謙朱延禧魏廣微並命閣中已有葉向高韓爌何宗彥朱國祚史繼偕又驟增四人直房幾不容坐六月國禎還朝秉謙延禧以列名在後謙居其次改文淵閣大學士累加少保兼太子太保魏忠賢竊國柄國禎佐向高多所調護四年夏楊漣劾忠賢廷臣多勸向高出疏至有詬者向高愠甚國禎請容之及向高密奏忤忠賢決計去謂國禎曰我去蒲州更非其敵公亦當早歸蒲州謂爌也向高罷爌爲首輔爌罷國禎爲首輔廣微與忠賢表裏爲奸視國禎蔑如其冬爲

逆黨李蕃所劾三疏引疾忠賢謂其黨曰此老亦邪人
但不作惡可令善去乃加少傅賜銀幣廕子中書舍人
遣行人送歸月廩輿夫皆如制崇禎五年卒贈太傅諡
文肅

何宗彥字君美其父由金谿客隨州遂家焉宗彥舉萬
曆二十三年進士累官詹事四十二年遷禮部右侍郎
署部事福王之國河南請求無已宗彥上疏言可慮者
有六帝不聽又屢疏請東宮講學皇孫就傅及瑞惠桂
三王婚禮太子生母王貴妃薨不置守墳內官又不置
墳戶贍地宗彥力爭之槌擊事起宗彥因言天下疑陛

下薄太子久太子處積輕之勢致慈慶宮門止守以羣
年二內侍中門則寂無一人乞亟下張差廷訊凡青宮
諸典禮悉允臣部施行宗社幸甚不報尋轉左侍郎署
部如故四十四年冬隆德殿災宗彥請通下情修廢政
補曠官明年皇長孫年十三未就傅宗彥再疏力言自
是頻歲懇請帝終不納四十六年六月京師地震上修
省三事時帝不視朝已三十載朝政積弛庶官盡曠明
年秋遼事益棘宗彥率僚屬上言自三路喪師開原鐵
嶺相繼沒瀋陽孤危請陛下臨朝與臣等面籌兵食大
計帝亦不報宗彥清修有執攝尚書事六年遇事侃侃

敷奏時望甚隆其年十二月會推閣臣廷臣多首宗彥獨吏科給事中張延登不署名遂不獲與宗彥旋乞假去御史薛敷政蕭毅中左光斗李徵儀倪應春彭際遇張新詔等交章惜之而延登同官元詩教薛鳳翔又屢疏糾駁其時齊黨勢盛非同類率排去之宗彥無所附麗故終不安其位明年神宗崩光宗立即家拜禮部尚書兼東閣大學士天啓元年夏還朝屢加少師兼太子太師吏部尚書建極殿大學士四年正月卒官贈太傅諡文毅弟宗聖由鄉舉歷官工部主事以附魏忠賢驟加本部右侍郎崇禎初削籍論配名麗逆案

孫如游字景文餘姚人都御史燧曾孫也萬曆二十三年進士累官禮部右侍郎四十七年冬左侍郎何宗彥去位署印無人大學士方從哲屢以如游請明年三月始得命部事叢積如游決遣無滯時白蓮無爲諸邪教橫行宗彥嘗疏請嚴禁如游復申其說帝從之七月帝疾大漸偕諸大臣受顧命帝崩鄭貴妃懼禍深結李選侍爲請封后選侍喜亦爲請封太后以悅之楊漣語如游曰皇長子非選侍所愛選侍后嫡矣他日將若何亟白執政用遺詔舉冊立登極三日公卽援詔以請如游然之八月朔光宗卽位三日如游請建東宮帝納之俄

遵遺旨諭閣臣封貴妃爲皇太后如游奏曰考累朝典禮以配而后者乃敵體之經以妃而后者則從子之義祖宗以來豈無抱衾之愛而終引去席之嫌此禮所不載也先帝念貴妃勞不在無名之位號陛下體先帝志亦不在非分之尊崇若義所不可則遵命非孝遵禮爲孝臣不敢曲徇自蹈不忠之罪疏入未報如游尋進本部尚書帝旣命建東宮又言皇長子體質清弱稍緩册立期如游力持不可二十三日命封選侍爲皇貴妃期已定矣越三日帝又趣之如游奏曰先奉諭上孝端皇后孝靖皇太后尊諡又封郭元妃王才人爲皇后禮皆

未竣貴妃之封宜在後既聖諭諄切且有保護聖儲功
卽如先所定期亦無不可帝許之選侍以貴妃爲未足
必欲得皇后二十九日再召廷臣選侍迫皇長子言之
如游曰上欲封選侍爲皇貴妃當卽具儀進帝漫應曰
諾選侍聞大不悅明日帝崩朝事大變如游請改冊封
期報可熹宗爲皇孫時未就傳卽位七日如游卽請開
講筵亦報可十月命以東閣大學士入參機務言者詆
其不由廷推交章論列如游亦屢乞去帝輒勉留天啓
元年二月上疏言祖宗任用閣臣多由特簡遠者無論
在世廟則有張璵桂萼方獻夫夏言徐階袁煒嚴訥李

春芳在穆廟則有陳以勤張居正趙貞吉在神廟則有許國趙志臯張位卽皇考之用朱國祚亦特簡也今陛下冲齡臣才品又非諸臣比有累至尊知人之明乞速賜骸骨還田里帝仍留之如游十四疏乞去乃加太子太保文淵閣大學士遣官護送廕子給賜悉如彝典家居四年卒贈少保諡文恭孫嘉績字碩膚崇禎十年進士授南京工部主事召改兵部

大清兵薄都城按營不動衆莫測嘉績曰此待後至者卽舉衆南下爾越三日蒙古兵數萬果從青山口入卽日南下於是尚書楊嗣昌以嘉績知兵調爲職方員外

郎選郎中督師中官高起潛譖之會有發其納賄事遂
下獄己黃道周亦下獄嘉績躬親飲食湯藥力調護之
因從受易會諸生涂仲吉疏救道周帝益怒移獄錦衣
嚴訊諸生與道周往來者多詭詞自脫獨嘉績無所隱
擬雜犯死罪繼擬烟瘴充軍皆不允保定總督張福臻
陛見薦嘉績才請用爲參謀不聽徐石麒爲刑部尚書
具爰書奏乃釋之福王時起九江兵備僉事未赴魯王
監國紹興擢右僉都御史累進東閣大學士王航海嘉
績從至舟山其年遘疾卒

贊曰熹宗初葉向高以宿望召起海內正人倚以爲重

卒不能有所匡救蓋政柄內移非一日之積勢固無如何也劉一燝韓爌諸人雖居端揆之地而宵小比肩權璫掣肘紛撓杌隉幾不自全朱國祚何宗彥絀於黨人孫如游又皆以中旨特用爲外廷所詬於是而知名良相遭誠千載之一遇也夫

明史卷二百四十終